

筆記小說大觀

集

蒼蕞編

清俞樾纂

第四冊

進步書局校印



舊叢編卷十一

清 曲園居士纂

徐驢

徐驢。蘭溪人。七歲失父。及長。有巧思。其俗設祭。每刻楮作魚龍花鳥。置盆盎間。驢為之。工不與他人等。以是鄉里報賽。輒多得錢。市肥鮮以奉母。必損值以告。俾食而安之。己常蔬食。弗之共也。母疾。禱於神。刮左肱和藥以進。疾良已。母歿。塋費龍山下。乃築及肩之墻。度木焉。覆以稻草。上漏下濕。非人所居。迅雷大風雨。則終夜起立。篝火燭之。蠅蚋即且之屬。累累也。時見雄虺。猛獸。近墓輒避去。旁近人或來與語。必諄諄勸其為善。久而化之。禾稼既熟。周數里不設守望。歲時有攜菜茹拜驢父母墓者。因以遺驢。驢弗受。即傾筐而去。驢嘗掘地作潭。汲水。人稱為孝子潭云。邑令左君聞之。乃詣墓所。揖驢出。為沐浴易衣。尊以儀仗鼓吹。觀者如堵。驢猶不欲去。號哭乃行。左君使從書院肄業。歲給麥八石。驢曾祖介昱。曾祖妣余氏。年二十而寡。撫其子。依母家以居。為諸嫂執爨。終歲勤苦。未三十而偃。偃如老婦。兒年十三。復攜之以歸。歲大穰。哭曰。天乎。與兒俱死矣。夜夢神語之曰。有雞可賣。何泣為。詰朝視時。無雞也。

見藉床草在門後。試屈折之。宛然鷄也。悟曰：此豈可賣耶？復翦紙為冠距。傳之翼。命兒攜以適市。人競取之。一雞得三錢。母子藉以俱飽。蘭溪院長姜炳璋作母有雞詩曰：阿母饑餓兒啼。兒母啼。母有雞。有雞無饑神告之。母青年。貌若媪。索雞不見雞。乃見藉床草。屈草作雞形。翦紙翎與爪。一雞三青蚨。百雞一束藁。雞乎雞乎。餓母飽。母有曾孫。其名曰驢。三年藉草。二親墓旁。白日暗黃墟。雞聲號曉霜。一門節與孝。千秋揚其芳。

見莊  
所集

### 邵如椿

邵君諱如椿。字莊園。浙江紹興人。考南之。挾中韓之術。游陝西最久。君遂占籍咸寧。補弟子員。能世其父業。攜孥就通渭。知縣之聘。乾隆四十九年五月。甘肅逆回田五。由鹽城南竄。距縣城信宿而近。謀者以告。知縣將逃。君曰：子宰一邑。而使城中生聚。皆陷於賊。其可乎？且逃則死於法。守則死於賊。與死於法。寧死於賊耳。縣令許諾。然惟怯不任事。君乃立於門閭。袒而大呼曰：好男子當從我守城殺賊。賊頃應者數千人。乃令壯者執刀矛。老弱運甕石。並集城上。而身率猶子曾燮。登西墉以當賊衝。十一日。賊至城下。城垣庫薄。又倉卒不能具火器。賊蟻附而上。君手短刀。格鬪良久。不



支被執見賊方屠戮乃曰首議守城者是我也何多殺他人為賊遂斫額批耳斷頤洞腰腹剗左右臂凡十三創而曾變奮力捍衛亦被十一創偕君罵不絕口以死知縣匿旁舍得免事定逮入都以失陷城池論如律

見莊  
所集

### 吳漫公

漫公情諧而性狷者也少時讀書不成然通六書之義事之所指形之所象與夫形聲會意之趣轉注假借同異之說有號為文人者所不能知而漫公一一知之由小篆而上溯之至於大篆古文鐘鼎款識之別於時代者靡不徧觀而盡識焉既知之又學而能書之故他人之書由真行而通於隸篆漫公書則濫觴於篆籀已乃順而擴之於是行楷八分皆有法度可觀然家貧必自食其力乃曰雕蟲篆刻宜壯夫果不為耶遂肆力於繆篆工摹刻售其技而因以名於時江寧沈君凡民權徽州府同知事以篆刻知名者久有天下圖書第一之目見漫公所作嘆曰藝蓋至此漫公喜將往謁之一日沈君至府漫公望見之華顛白髯面斑斑如凍黎乃驟然而哈曰吾觀若長我且三四十年我如其年藝或當過之遂不復往見其自矜而善謔也如此人無識與不識欲求書分篆刻者苟見其面攀延之未嘗辭至或數日不歸思歸矣

或援而止之。則遂止焉。巨室富家知其如此。以為易致之也。冀其一來。要之。且至於再三。往往終年不見其至。其家有吉祥喜事。賀客滿堂。坐中必無漫公。初漫公為汪氏學生子。一母既不能乳兩子。而家貧又不能致乳者。會吳氏佩蘭翁亦貧家也。無子。遂抱歸乳之。而翁旋卒。母氏青年守節。撫之育之。俾至於成人。母卒。格於姪例。漫公乃請於郡守徐公。縣令張公。並給匾額以褒之。合於名律。養子從姓之條。遂成室於吳。娶王氏。而漫公所自出之。母年老矣。思念之。因言於吳。為娶曹氏。已而漫公所同產之兄死。有一子。亦相繼而亡。於是漫公寢疾。自念不能起。乃親書遺言。付二子。士懋。士慎。而命士懋承汪氏祀。蓋士懋曹氏所生子也。此所謂亡於禮者之禮。其亦禮之善物矣夫。漫公名兆傑。字雋千。號曰漫公云。見程瑤田集

### 張若筠

張君諱若筠。字竹鄰。丹徒人。好學。於書無所不窺。聞有異書。輒重價購之。或手邊騰校勘。砵砵不少休。同縣蔣舍人宗海。藏書三萬餘卷。多善本。君所藏踰二萬卷。而法書名畫。吉金貞石之。別為卷軸。不在此限。京口士大夫收藏之富。推此兩家。君性簡重。寡言笑。不妄交人。晚年益屏人事。掃一室。日坐卧其中。子弟僮僕。非呼召不至。

前沈潛玩索神凝氣寂過之者以為無人也與兄坤弟堂相友愛家有園亭竹木之勝兄弟並能詩善飲精鑿賞暇日具壺觴召朋舊流連倡和互出所藏元明人書畫品題甲乙以為樂坤子奎堂子鉉及君之子銓亦能詩奎兼工畫揚州某氏藏書為江淮間第一其子孫不能守君聞即冒風雪渡江購得宋整書數部以歸奎為作風雪載書圖一時名士皆為之題詠京口多佳山水君興至即出游愛八公洞林壑幽邃讀書深雲精舍者數年大江南北名勝之區屐齒殆徧而杭之西湖凡七至君少以諸生高第食廩餼循例貢太學遂不就試其居鄉睦婣任恤樂振人之乏絕嘗以田百畝為書院諸生膏火資邑有留養局以養鰥寡孤獨貧病之人君以田四百畝佐其費鄉人德之嘉慶三年卒年六十四

見劉台拱集

### 董十先生

先生名懷書字邃學世居宜興縣西南山中胥井村號胥井董氏父啟峯公舉五丈夫子先生其季行十學者稱董十先生生有異稟跖弛不羈五六歲時鄰家釀酒仰卧其下以口盛之大醉淋漓濡首顧聞讀書聲則喜竊聽一二過即背誦如流水九歲就鄉塾穎悟絕人年十一瀏覽左國漢史諸書輒捉筆為文勃勃有奇氣尋丁父

喪以貧故廢學業農兼服費伯凡某以百金命之潤州貿易數月傾其資而歸凡大怒先生雅不屑意也然緣此益窘乃更折節砥行發篋陳書晨耕夕讀或采樵山中高歌秦漢人文字尤嗜韓昌黎吟誦不少輟里中課藝常荷鋤任援筆立就每冠其曹名震一邑工文士爭先結納於是輟耕樵業教授生徒而所得脩脯輒以沽酒垂手立盡貧益甚酒興日益豪每醉則哭或放聲長號儕輩皆怪之以為狂平川蔣公以詩古文辭伏一世猶心折先生謂其子楚誦曰此振古豪傑士也年垂三十尚困童子試一日自塾中歸聞縣試期迫即夕秉燧夜行試畢復夜馳歸往返二百里深山峻嶺高吟長嘯聲震林谷竟冠一軍即於是年籍於校先生長身鶴立慷慨負大節以古人自期家徒壁立而揮財如糞土意氣浩然公正事輒發憤遇豪強黜辱不少懾避而山紫升科一事有德於民滋鉅其他義激公憤挺身犯大難者數矣卒得無恙亦屬有天幸云生平尤篤友誼應試澄江白下輒沽酒置精饌招同志諸人痛飲雖金盡典衣不顧也嘗曰考試甚苦余獨甘之非為沽名樂與素心人共晨夕耳先生歿後頗著靈異聰明正直死而為神理或然歟墓在寒墅祖塋側過之者雖樵夫牧豎必肅拜殆類江都相之下馬陵云

見儲所瑛備  
圍古文集

郭六

郭六者。江陰市人也。其鄰吳某。以乙科將令青神而艱於裝。吳之僕有給六者曰。若居積於市。拮据所得。日百錢耳。曷以所有奉我公。隨官人高車駟馬。且償而息十倍。六是之。乃罄其貲。得百金以獻。而隨入蜀。既至青神。六無一長居署中。執爨而已。久之。吳公亦已忘郭六之所以入蜀也。而役使之。其公之子若猶子。下至臧獲胥役。使之。而六亦不自言。日執爨事。惟謹。久之。吳以侵冒軍儲落職。於是諸子諸猶子。下至臧獲。各席據其貲。或不告。或詭告以故。皆去。比吳入獄。挾襖被從者。郭六一人耳。吳公性仁而闇。諸子用事。欺之。以至於賤。既賤。諸子爭擁厚貲歸。而吳公特貧甚。六忍饑寒。事之彌謹。時獄中謫官凡數人。常詩酒過從。六竊私念。我公數飲食諸君。而諸君聞至。醴酒不設。非報稱禮。乃私以百錢市酒脯。伺公與客談。且久而敬進之。客既去。公問。以情告。則怒而置之。六直受。不敢出一聲。詰旦竟去。去久之。突以僧服至。青神。復謁公。泣拜階下。公且喜且泣。下曰。若胡以僧為。余所虧項。賴僚友相周。十有六七。俟諸子鸞座至。可千金。幸而集。猶有首邱想。而胡以僧為。袖出一金。若持去。伺逆旅中。朝夕當入見我。六頓首謝。去之旅次。忽病。略不省人事。沈沈如醉。凡十日。而吳

卒以限滿不償論斬。斬之日。逆旅主人彊扶六起。椎其胸。號而告之。六瞑目直視。忽疾趨出。至市中。伏公屍而哭極哀。一市人骨出涕。既殮。塋城外隙地。凡知公者咸來唁。六衰麻被體。執杖匍匐前。稽顙答拜。慟如孝子云。儲玉閨者。故嘗之青神。交吳公。雅知六。因勸之歸。且曰。爾有父母。曾聘妻未娶。豈得僧終異鄉者。余不久南還。盍隨我返。六不應。既而候玉閨於寓。泣而告曰。六不歸矣。黃連二舫。幸致六父母。為贖老費。囑六妻速嫁。六不歸矣。則再拜號慟而去。異哉。郭六之為人。也。無故棄其垂白之親。已聘未娶之妻室。捐百餘金。隨人於七千里外。而為之賤役。為之子。甚而為僧。其無乃非人情。然以其人親所生之子。若姪。暨用事童僕。籍其財。掉臂去不顧。而一鄰人之子。又愚其破家自隨。而訖患難。生死以之。則又何也。不亦異乎。見備研齋偏園文集

### 張瑛

張瑛字玉采。汾陽縣人。家素饒。每於歲杪。出粟若干。周鄉鄰中之貧者。以為常。康熙三十六年。饑。瑛既出財粟助賑。而賑所不及者。持田契求售。踵接於門。皆自貶損價值。瑛第如其願售之。價視平時。蓋不及十之二。於是得田且千畝。明年大熟。瑛徧榜各村曰。願贖者聽。匝旬盡贖去。其行事大致類此。瑛所居曰西官村。先是順治六年。

姜瓖之亂。東官村趙姓者。眾乘亂劫其家。男婦俱被殺。獨一穉子奔至瑛所。瑛納之。眾來索。瑛曰。是不可得。必欲得者。吾兩村且鬪。視強弱。及亂平。瑛助趙氏穉子白諸官。治罪者十餘人。當盜賊之蠱起也。瑛之村人將逃避賊。瑛曰。賊至。知而先離散。能保即獲全乎。孰若為守計。眾以村故無堡寨。未可難之。瑛曰。堡寨誠不可猝為。環村而溝焉。其可。遂相率為溝。廣一丈有奇。深約倍於廣。東西設吊橋各一。又以其家樓堡封貯村人財物其中。既而賊大至。踰溝。村之人退入。瑛見一賊方據椅坐。左右指麾。急趨有力者。舉石礮投擊。中之。身首俱碎。立斃。乃其渠魁也。餘賊怒。攻之急。樓上瓦石亂下。不得近。乃取薪積於門。欲火其樓。宅舊有井。僅供汲用。至是。泉忽大湧。男婦遞傳水於樓。以撲火。賊計不得施。又失其魁。數日稍稍去。瑛曰。可以出而逐之矣。相與持械出。大呼擊鬪。賊奔潰。方是時。瑛年纔十有九。遠近村被賊殘破不一處。而瑛之村獨完。聚如平常。人服其智勇。瑛九十有一歲。視聽不衰。不脫齒。行不杖。一日無疾卒。見戴震戴氏遺書。

王敏

王敏。汾陽縣武生也。廉潔自持。值歲饑。斷餐。二日得一飯。弟手白金至。曰。少易粟。敏



正色語第。奈何千人敗家風。令持去。嘗有督理事。司出入事竣。眾指餘金曰。準材計。覺不宜餘。殆君之物。雖入於內耳。敏曰。諸君謂我貧。意以餘金畀我。公事不可實私。橐友以其困。欲有贈。袖百金至。坐語竟日而返。難出之袖中也。遠近咸呼王廉士。然生平勇於為人。眾以公事宜謁有司。二日不得達。敏至。徑入陳。眾方疑畏。而敏詞氣慨然。有司無以屈之。卒如其請。一友人觸官長。在縲纆。親戚畏避。而敏往來省視。官長訪知其名。不加怒也。敏老而無子。一婢自幼畜之。長有姿容。或勸納以為妾。敏曰。吾貧困。何又重累少年。尋有不惜三百金求購此婢者。或以勸。答曰。貧。吾分也。恥因婢取財。况不得其所。彼之生死事大。吾雖終窮。弗忍為。於是即為擇配嫁之。敏嘗徒步赴省試。旅舍中。遇一稚子。察知為被誘者。走百里送歸其家。則寡婦撫此兒。忽失之。正遑急。不欲生。望見兒。母子如獲更生。願酌謝。敏曰。吾憐稚子無依耳。何謝為。遂行。敏狷潔多近義。是以人嘖嘖喜稱道。年七十有一卒。送葬者塞於途。見戴震戴氏遺書

### 董丙齋

董君諱連存。字華星。號丙齋。先世自教授公博古官於毘陵。因家焉。君七歲就外塾。矢口成文。家故貧。且體羸多病。而刻苦自厲。不間寒暑。中乾隆庚午科舉人。登壬申



科進士。授國子監學正。以太孺人齒高。遂請終養歸里。太孺人壽九十六而卒。君反慕如嬰兒焉。家傳青囊書。少即有神解。後出游。復獲異人授。凡形家日者星角壬遁諸術。無不洞達其奧。然頗自秘。惟以相宅墓請者。率應之。所至為人審決。衰旺更易。向背克期。輒有神驗。以此名曰隆。東南自大府以下。每營廨宇。必得君一臨相度。為幸。所聘遺亦不貲。而君受之灑然。行囊及家。未嘗自潤。購吉壤為先人改葬。建宗祠。置田百畝。以供歲時祭饗。所居數椽。僅蔽風雨。冬夏衣故表葛。塵垢色黧。弗厭也。會郡東郊欲建普濟堂。瞻老疾之無依者。久未經始。君慨然獨捐千金倡之。乃得集事。君藹易近人。而遇所不可。夷然弗屑。嘗有淮陰睡賈。具重幣延君。中道忽不就。單車徑走二千里外。為故人卜兆域。以踐宿諾。飄然而返。其孤介如此。見錢維喬竹初文鈔

### 洋和尚

洋和尚。南豐瑤埠村人。姓曹氏。名不傳。人以其兩目頗綠睛。頂髮禿。但呼洋和尚云。年十五。為邊將所掠。負軍裝出入塞上。壯遂趨勇雄。其曹能馳騾馬。挽強弓。左右射。聞吳三桂叛。南方騷然。潛脫身歸里。聚子弟之壯健者。陰部勒之。尤有智能。料時變。知取精忠必叛。叛必遣賊由汀州。窺南豐。趨江西。謀築若保鄉民。先挫賊銳。得三百

餘人。椎牛軍山神廟。滌酒歃血。慷慨論大美。綠暗光閃閃。衆感泣怒憤。願效死力。仰見神面微醺。衆喜曰。神助我。神助我。軍山者。南豐邑之鎮山也。高聳天表。村距山近。多詭嶂奇石。上有天生城槽可砦。其最險者。曰虎頭砦。多石屋。可容千餘人。南僅梯一綫如穴。縋之上。塞一石。可限萬夫足。若兩翼。可出守望。洋和尚笑曰。天險賜我。賊不足禦也。乃聚糗糧。厲器械。備井竈。陂瀑泉流。指畫戰守計。徙闔村民居其上。寄語城中人。爾第固守。吾必盡剽之。若下。已而賊前鋒果至。先是。洋和尚勇聞江闔間。賊計嚙以官。作鄉導。及至。仰望砦形狎惡。斗絕如虎牙。下闔四壁。皆攸搜人。猿猴無敢踰。旗幟鉦鼓殊森嚴。賊既膽聳。雲梯。呂公車不可試。砦中飛石標弩如雨下。擊殺賊數百人。賊怒。毀村屋材。薪其下。思燔砦。而石壁皆含泉脉。天生滋潤。水恒淋漓。滴火不能熱。賊計窮。請其渠曰。砦險而固。破不易。盍棄之。而趨建昌。渠曰。不可。建昌有官兵在。吾戰。則洋和尚必躡吾後。背腹受敵。危矣。以一月糧攻之。必殘。然後西出耳。遂掘塹守之。乘間出他村焚掠。洋和尚佯與衆賊歌飲。俟賊少怠。率死士二百餘。從他險縋而下。直斫賊營。砦上婦女。各擊銅器。助鉦鼓聲。撼天地。石泉風樹皆震嘯。若萬騎下。賊駭懼。不知所為。自踐踏。斃之過半。洋和尚斬其渠頭。大呼鼠輩。敢辱吾刃。令

汝取逆戴其頭來。既歸。若謂其眾曰：小勝勿驕。賊必悉精銳來。吾糧僅足支一月。早  
密遣健足齋血詞。間道赴省城告急。十餘日。偽帥李以大軍繼。洋和尚預設伏。磨刀  
渡左崖穴。俟賊半渡。標弩突發。射殺前隊數將。賊駭多墮。盱江死氣為奪。指若切齒。  
罵曰：吾不血此若。醢洋和尚肉喂犬。誓不生。遂掘長塹。築高壘。待若糧盡。乃屠之。洋  
和尚每出奇計射賊。相持三十餘日。賊不能動。繼毫而江西大營援兵至。偽帥迎戰。  
南豐東郊。官兵陣稍却。洋和尚盡其眾下若。奮力夾斫之。賊大敗。遁歸汀州。南豐以  
全。帥召洋和尚至。給牛酒慰勞。曰：使江西半壁不動者。汝功也。將奏之朝。予以官。洋  
和尚叩首固辭。帥曰：義士義士。即百年後。汝鄉人當祀之。社厚予白金彩繒。洋和尚  
盡散之。鄉人葺破廬安生業矣。乃日與其徒。短衣草履。漁釣射獵為樂。春秋佳日。擊  
鮮提瓮。登舊砦。狂呼酣飲。逍遙四十餘年。歿壽八十。鄉人憶帥言。塑其像。鑿而鑿。祀  
諸社。歲旱。以簫鼓彩幟。昇行墟市中。呼曰：洋和尚來。洋和尚來。天果雨。洋和尚終身  
無妻子。老猶自製竹扇。易錢沽酒。醉作擘窠草書。甚怪也。見張九鉞  
陶園文集。

### 温樵水

樵水姓温。名廷鈞。字右衡。樵水其別號也。祖籍浙之長興。高祖美如。遷仁和。樵水生

及時。因厭其啼。置其祖膝上。季父世珍。讀書其側。啼遽止。遽領類。為讀書狀。已乃啣  
唔成聲。日為常。五歲。其季父語以讀書樂。則欣然。偕白其祖。就隣塾。記誦之。捷常。兼  
他童子。年十五。入邑庠。二十赴省試。貢於成均。其學業始嗜詞賦。熟精於文選。所作  
义手立就。奇字爛如。觀者菟目。才名播一時。久之。乃謂所業弗善。取六經三史。熟之。  
條其疑義。作古今體詩文。率行以唐宋大家法。雖應試不易也。雖躡不悔也。嘗語其  
游曰。讀書不第。自不折閱。不汲汲於經史。而以鬼困册子老乎。同里陳翁寅。以窮經  
論史為業。名流就攷問者。日無虛年。倍樵水矣。而相得如等夷。每著經說。必俟其過。  
從。商校竟日。每詠史。必索和焉。樵水性貞介。氣清可畏。人以是多望之。見其來。稍稍  
引去。然語崖岸嶄然之行。則莫不推樵水第一。語能詩之才之浮於名者。則莫不推  
樵水第一。年二十八。病心血耗卒。卒前三日。猶寓書陳翁。論韓詩商頌說。翁議刊其  
遺稿。屬其季父蒐輯於其家。苦散佚不多有。見蔣師煥  
敦民堂集

王次瑤

當世多治鄭氏易。網羅放失。是正文字。彰矣。德清王君南湖。攷證之作。向櫛字比。疏  
通證明。使北海微言。復闡於既絕之後。厥功偉焉。君諱瑤。字次瑤。南湖其號也。晚又

號退思。乾隆甲午科舉人。丁未會試。大挑一等。分發直隸。補成安縣知縣。少嗜易。著  
易集解。備究衆說。又能研窮形聲訓詁。作集韻正。以糾曹氏刊本之失。作說文編韻。  
讀各從義。以補徐氏朱氏之音。作爾雅足義刊誤。以匡邵氏之違。既而覃思畢精於  
鄭君注易之意。心知其故。攷經以釋文為主。不言鄭本者。舉所標他本參訂之。攷注  
則汎宋羣籍。擇善而從。旁及異義。以附鄭說。因推所存。知其所佚。引伸觸類。以達厥  
指。官成安時。以風俗教化為己任。聽事之暇。召邑諸生。以講經說義。吏胥子弟能文  
者。咸進與焉。有師氏兄弟。爭田相毆傷。置之一室。使不傷者。養傷者。而身譬喻之。兄  
悔悟。泣拜。讓田為公產。上官以為賢。將換授繁劇。意不樂。引疾去。讀書終身。君世居  
德清。千秋鄉之闕山。六世祖權。移居於南莊。祖繼聖。父元鼎。兩世居杭州。君仕而歸。  
卜居秀水之秋涇橋。墓於錢塘長壽鄉白沙山仙家隴。見王宗炎晚  
聞居士集。

### 跣足傭

跣足傭者。楚人也。陳其姓。才高其名。少孤。鮮兄弟。窮不得活。去之寧州。東南長茅里。  
終歲傭人。以脫於饑寒。跣足役作。雖巖巖荆棘中。履踏如坦途。無所苦。人以是羣呼  
跣足傭者。傭狀甚癯。蓬頭垢面。膚如漆。擁蔽衫。補綴針紉。纍纍若蟻。虱然。嚴冬無床

褥。獲稻草藉地而寢。嘗暑月從容宿館舍。客張帷。夜半苦蟲。不得寐。起燭之。則傭方倚墻壁。齧齧。雙眸炯炯。恣蟲啜。啜唱。啜啜。客叱曰。斂子何不揮之去。傭笑頷之。睡如故。生平不葷。不飲酒。不畜妻子。其傭於人也。日取十錢。多與之。不受。暇則閉戶。掘履三四日不食。亦不饑也。掘土納積。月檢視。遇廢疾餓寒者。出投之。往歲傭冒暑踰毛竹山。喝甚。求飲不得。幾死。適刈蔗者憫之。斷節揉汁以甦。傭歸。盡發所藏。即其地搆亭。日煮茗飲行者。又廣其惠於他地焉。一日傭被髮持長鏡。雜衆中。艾人田。衆再休。獨傭俯首病瘦。劍鋤不輟。衆固止之。固勿聽。衆怫然。既相與斥之曰。吾儕與子俱傭也。傭無常主。吾儕食倍子。取又倍子。而人卒不聞異視子。然則子何太自苦為。傭曰。然子輩所求乎人者。誠是。雖然。吾性拙。又衰。得飽一日腹。即窮一日力。猶懼忘事。獲天殃。敢含業嬉乎。今子輩不已之求。而使吾效尤可乎。言訖。愈執業不輟。見萬承風集。思不辱齋。

李松亭

李君諱鏞。字異凡。號松亭。其先范氏。自宋世居登封。為著姓。迨明中葉。有諱尚者。遷魯山。遂別族為李氏。君姿貌沈毅。目炯然射左右。望之屹不可犯。然性獨樂易。好與

人酬接庭前時老梅數株多叢竹菊雜花卉。身自灌溉有老松。僂偃如龍。蒼叢壓屋脊。君顧之而嘻。輒盤桓其下。號所謂松亭。由此也。暇則摹繪事。酒酣引筆。落落自喜。或劇飲。懷甚。與好事者。校拳勇。大相娛樂。以故人多愛從君遊。有梁鰲者。依門下未幾。以他事被繫。君身在任。而鰲潛逸去。踪跡莫可得。幾為當事者所中傷。君益不置意。而好客如故。他日。君獨游縣之東山。遭羣惡少。脇掖一少年。少年左右顧。顛踵不肯行。詢之。則羣惡少出穢言。欲行強污者。君大怒。徒手搏數人。盡仆。奪少年以歸。遣僕護送之。固近村田家子也。君負氣而尚義烈。其遇事奮發。類如此。見武德授經堂集。

### 李仲謀

李君坊。字仲言。後易字仲謀。籍祥符。入開封府學。為廩膳生。方十五六歲時。伉俠慕交游。然性尤簡易。奴視其儕伍。居嘗佯佯不適。欲得友有風烈者。或以某告。君趨見而返。恚曰。向殊妄聞。此曹徒一行尸耳。乃勞某過從耶。他日。君在京師。鄉人官廣平者。慕君。邀君主某幕。不合意。棄去。閒從李西村官所。前後幾五年。自西村初署縣事。及得補寬。君恒不避嫌怨。為之左右。其僮奴僕御胥吏。外內聽役。日有常約。違輒痛繩之。或有驕頑。君手扑其人。一署飲暗。莫不屏懾。後西村以憂去。君於交代委籍。悉



強力綜練。條分簽疏。事覈其實。以故與後事者忤。至詬厲不少顧。俾西村幸無累。然後自謀歸。策蹇走三千餘里。轉貸以抵里門。至是亦倦於游矣。初君在京師。謝弔者當過一顯人。自具小東書名投其門。竟去。人多以是非君。君曰。吾粗野習。安識所謂士大夫禮。且如公等指。即謹易手本。亦與今外司道府謁尚書同儀。獨非僭耶。禮不下庶人。吾諸生。何殊於庶人。幸勿復言。聞者羣服其辨。而不知君固負氣。以詭詞辭也。見武德授經堂集

### 彭梅谷

彭梅谷。名遐齡。明末奇士也。家河南魯山。生十月。能言。十歲。通毛詩禮記春秋比長。益博綜羣書。下筆千言立就。兼嫻武畧。能騎生馬。駒上坂。馳左右射。發無不中。自謂辛稼軒。陳同父。一流人。崇禎丙子。年十九。應省試。以五經格於例。置副車。改就武闈。試哀然為解首。撫按以文武才薦。而廟堂循資格。寢不報。己卯。再以五經試。仍置副車。自是遂罷舉。益務為任俠行。總兵陳永福招之。遂暫留參永福軍。潼關兵敗。永福降賊。梅谷陷其軍中。先是賊相牛金星。本賈豐舉人。授經旁縣。館梅谷家。梅谷幼師事之。及金星從賊。往來河南。嘗蹤跡梅谷。梅谷深自諱匿。至是聞在永福軍。大喜。趣



召之曰。若我弟子也。來則立富貴。不來且死。梅谷大言曰。若已為賊。即死。豈從賊。狠金星命收之。而梅谷已竊騎逃。一日夜馳五百里。越太行。乃得脫。開行至江南。度時事無可為。謀歸夏邑。中途遇盜劫。不得已。由故人薦。入直內院。數月。出主江浦簿。忤上官。拂衣歸。順治八年。卒於百尺河之野。年三十四。先卒時。自撰年譜。謂生平流離奔走。無日不在憂患中。遺詩一帙。亦多感時念亂。識者讀而悲之。

見咸學標  
鶴泉文鈔

### 董靜芳

董靜芳。祝魯齋婿也。為人孝友。勇於義。自以幼失怙恃。既贅於祝。傾貲為外氏養生送死。最後有信陽負骨事。初魯齋祖廸前公。由副貢令清苑。有五子十孫。登進士舉茂才者八。先後殂。謝盡。君皆塋之。獨魯齋之伯中調公。病卒莊浪官舍。叔愚亭公。容死信陽。骸骨久未歸。魯齋老貧無子。言輒涕泣。告其女以為大憾。君聞而心識之。會游秦。徧訪。得中調公後人。以告魯齋。喜曰。吾祖其不餒矣。願叔向為異鄉之鬼。可若何。魯齋沒後十數年。君有武昌之役。遂取道德安府。貽書應山令莫公子捷。告以收骨事。給文沿途查訪。由應山至信陽州百餘里耳。州城北有瑚璉書院者。乾隆丙子丁丑年。愚亭公嘗掌教於此院。側伴書庵老僧。猶能言之。而未詳死狀。時知州事者

諸公以謙鄉人也。授以文。翌日遣役來得公之去妻春梅。嫁後復寡。言公有殤女。曾許字醫官吳棟之子。又紹興徐書紳者。久負公之銀。乃共謀藁葬於城北三十里許。梁家墳。時徐已故。吳年八十餘。偕之出城。荒塚纍纍中。見羣鴉噪一大樹。跡之。得土中仆碑。鐫曰。浙杭海寧縣歲貢生。祝諱漢字愚亭公之墓。吳曰。此徐所立也。三十餘年矣。請於官。收骨貯橐中。歸瘞之祖塋。告祝氏家廟。此癸丑冬事。先是君之伯慕梁公歿。其長嗣曰可大。無子。而久客於楚。君喟然曰。大宗何可絕。乃乞其弟虎文子善餘。攜之武昌。後之。蓋其往也。為董氏綿宗祀。其歸也。為祝氏殮旅魂。數月之間。兩舉孝義事。厥功偉矣。見周廣業道廬詩文集

### 趙雨亭

趙雨亭名瓏。安徽桐城人。少讀書。性倜儻。不羈。輕財重然諾。有古俠士風。丁未歲。過表甥大名尹葉君。賜署甫踰月。賜緣事成伊犁。戚友倉黃。星散。奴僕脫身去。賜父母老且病。痛子子身投荒。日夜憂泣。雨亭毅然曰。與人共安樂。而不與共患難者。非義也。玉門關果不能生度耶。余雖老。尚堪一行。遂偕往。躍馬鳴鞘。略無難色。至伊犁。將軍愛賜才。置幕中。甚得所。雨亭始告歸曰。汝居此安。余且歸。復汝父母。當再來。終不

使汝寂寂萬里外也。歸一載。暘母卒。雨亭慮暘聞訃哀毀。復往慰之。至關外。聞暘隨將軍移駐塔爾巴哈台。改轅而北。將軍聞雨亭至。降塔執手曰。義士果來矣。歌禮愈重。由是雨亭之名大著關外。將歸。將軍厚贈之。俾同貢馬者行。重其義也。先有葉椿者。暘族孫。河州牧中之子也。以監糧事久戍伊犁。雨亭再出關。椿母以金託寄。伊犁在烏魯木齊西。塔爾巴哈台在烏魯木齊北。相距遠甚。音問阻絕。雨亭歸。路出呼圖壁。遇巡檢陳君棧。陳亦皖人。因述椿始知椿死伊犁久。雨亭曰。椿家無三尺童。白頭老母。日望其子歸。今椿死遠域。旅魂飄泊。情何忍。且余既挾若賞來。當攜若柩歸。因與陳君貸貲助費。迂道八千里。載其柩以歸於桐。見李符清海門文鈔。

### 羹湖先生

先生姓王氏。名繼統。羹湖其別號也。生有異稟。神寒而貌癯。幼從塾師講肄經學。稍長。即旁通諸史百家。以名諸生。丁明之季。乃絕意仕進。退而放浪於荒墟絕嶼之間。扁舟草服。自樂也。未幾。明亡。乃益頽然自廢。不求聞知於人世。世亦無有知之者。一日。停舟江上。擊楫作歌以自娛。其聲鏗然。若擊金石。鄰舟皆起坐驚視。是時海宇初定。值英王巡行江上。亦於舟中聞之。心奇其人。欲致不得。固以請而後就見。懽然談

笑如生平交。偶及世故。且喜其才。因給劄。命出為丞佐。對曰。臣故村野鄙人。但得具雞黍課漁稼。以終其天年足矣。安能有豪毛之利益於國家耶。其奚堪此郡佐為。長揖不受而歸。日鍵其戶。足不履城市者。且二十年。著有羹湖文集若干卷。見王灼集

### 滕家瓚

滕家瓚者。麻陽縣人也。居高村。與苗壤接。乾隆六十年。苗民石三保等叛。大掠麻陽。家瓚悉出家財數十萬。招集鄉里丁壯數千。以禦苗。殺賊無算。苗浮讐之一日。家瓚率眾守溪口。苗賊驟圍高村。曰。出家瓚乃已。於是家瓚之族弟家泰挺身出而語其村人。豈可惜吾一身。而延害一村。遂大罵賊。我即瓚也。賊剝家泰皮。家泰罵不絕口。至死不更一辭。又執其家口。始知其非家瓚也。瓚聞而馳歸救之。已無及矣。家瓚屢以殺賊有功。大吏具聞。上命賞以八品職官。一日戰歸。福督部親見勞之家瓚曰。瓚既受國恩。敢顧家歟。且家已破矣。苗讐也有殺賊報國而已。復慷慨往溪口。與數百人共守之。賊大至。急攻之。家瓚力關絕援。其從者曰。賊指名索天子。殆難免矣。盍易服而行。以求援也。易服而死。賊去。官軍至。求家瓚所在。以易服故。賊不識其屍。遂收其屍。葬焉。家瓚仗義輕財。好施與。又善撫眾。有信行。遠近之人。一時皆慕家瓚名。不

舉其姓但稱瓚也瓚有力嘗負一鐵礮擊賊輒殪云

見徐錄慶玉山閣集

### 張星象

張星象字介萬古田縣學生生有異禀嘗作書數千言抵龔進士景瀚願受業為弟子龔奇其文言於督學朱文正公歲科兩試拔冠其曹試事既竣公選九郡諸生之尤者福州十人外郡二十四人肄業鼇峯書院親課之寧化張騰蛟孟詞最為公所賞識介萬異軍特起乃拔戟自成一隊閩中因有二張之日時閩藩雨松徐公與文正公同號知人能得士嘗謂朱門之有介萬如韓門之有劉又也癸卯鄉試將揭曉文正公置酒招致門下士孟詞輩皆在坐介萬葛衫躡高屐最後至公目笑之曰昌黎詩有云冥觀洞古今象外逐幽好可為孟詞詠又有云雜作乘閒騁交驚舌牙醜非介萬其誰既而孟詞領解在坐者多獲雋而介萬報罷介萬文詰屈生澁不可句讀一題入手狂搜險覓得未曾有非文正公莫之奇介萬亦淚霰霰然落謂從此長已矣新督學至公薦士十人介萬與焉且恐其文不得當以為是實神駿當相賞於牝牡驪黃之外新督學甚其言書院初課故抑之且面加誚讓介萬弗能堪自念居深山讀史漢設筍揚十數年不過一過矣又不能及時自奮道師方行而齟齬之者

踵至。懼一旦遭黜辱。為當代大賢羞。時方寓龔家。早飯罷赴書院課。而是日實未作文。嘿嘿不樂者終日。次早獨行。出西門。至虹山橋。徘徊橋上。再四。遂自投於水。以死。年止三十有一。龔使人尋之。書院不得。啟其臥室。於案上見其訣父書。及與己訣書。拍案驚呼曰。介萬死矣。三日。得其屍於白沙舖。端坐沙中。面如生。其下有清泉一泓。先是介萬喜扶此。有白泉沙者附焉。辨論相往復。文思益奇。至是而具識乃驗。龔既買棺以殮。呈其書於徐公。且述其死狀。公喟然署其紙尾曰。嗚呼。生真死矣。自石君去後。余不能早為扶植。致生益孤憤。余不能辭責矣。介萬卒之十年。孟詞始登癸丑會榜。為忌者中傷。乙卯赴補殿試。卒於京邸。竟不得成進士。與介萬皆酷貧。無子。詩文皆散佚。見朱東鑑如古堂文集。

清 曲園居士纂

壽先生

乾隆五十一年。林爽文反臺灣。不旬日。有衆數萬。於是隴彰化陷鳳山。所嚮如破竹。獨淡水城不下。淡水圍竹木為城。無土石。自其年十二月至明年五月。攻最久而城獨完。民不為賊。文武官莫在。惟諸暨人壽先生為之守。先生姓壽名星。字同春。以字行。而壽先生之稱為著。以習文法。佐人治吏事。至臺灣。當是時。淡水同知潘凱前沒於生番。代者程浚。方按捕大甲。城中空無人。爽文以其衆入。程浚子倉卒攜印走。而浚別戰死。先生與其輩數十人。俱縛坐堂皇下。賊故聞壽先生能識官事。顧不知孰為先生。一一誰何之。已乃從先生求計畫。先生曰。而屬以烏合之衆。頗兵荒城中。何以食。官軍至。聚而殲旃靡及矣。凡兵分則見強。合則示弱。而奚若。賊故搜城中無積儲。則皆曰。然。因脫先生械。留其黨守城。而自出四掠。於是壽先生客淡水久。其胥徒皆故熟習。其士民皆故信服。頤指目語。精神響答。潛糾義兵。風雨倏合。出不意。就同知廳事。駢斬留守賊三十六人。即日閉城門。為朝廷守。賊聞大駭。悉衆反攻。先生部



勒其民。日夜登陴。樵蘇既斷。發屋掘鼠。得閒輒出。選鋒擊賊。有死者。明年五月。賊稍引却。道路通。署同知徐夢麟。始以印至。次第招安。白石湖。勦洗金貂尾寨。擒叛官彭喜。一切倚先生為辦。是時奕文負隅。據大里杙自固。我兵環營。其外疑莫敢入。先生不勝忿。謂夢麟曰。賊介恃其衆。今日戰。明日戰。可勝殺乎。不如入也。速入取其首。餘將瓦解。夢麟以其言上書軍門。不報。三請。然後得。指麾由大甲。分六路進攻。先生別以若干人。由西路入。而鹿港之兵。遽延失期會。既入。無援。馬蹶被獲。賊恨先生。久至是大喜。相與攢刃支解之。時先生年七十有一矣。又明年。嘉勇郡王渡海。檻奕文斬京師。臺灣平。有旨贈先生知縣。蔭其子聰一官。見王芭孫淵雅堂集。

吳鈞翁春

吳鈞字陶宰。自號曰玉田生。江蘇華亭縣人。其曾大父懋謙。以能詩。有名國初。世謂之華萃山人。至是百餘年。而鈞復用布衣稱詩。鈞生平不應舉。不知家人生產所好。讀書。旁通天文。勾股。金石篆隸。刻印之術。而尤自力為詩。歌古文辭。其於文好深湛之思。於詩不苟作。務自矯厲。不同俗。性介潔。時時為人教小蒙童。以食。有一子三女。無完衣。所居梅花書屋。在城東委巷中。詭垣塌井。鈞處之浩然。不輒受人一錢。人亦不



敢輒餽之。華亭自明入本朝。代有聞人。文章氣節。翰墨昭一世。鈞生衰絕之後。憫傷鄉先生風流墜地。文獻軼亡。乃日曳敝履。雙雙問巷間。訪尋遺文。渝墨故紙。手自編寫。人各為傳。欲用漢唐人總集之例。悉錄當時撰著。勒成一書。以為掌故。未及成而卒。年五十四。鈞雖靜退。足迹不出數百里。交游不過五六輩。無由自發其恢奇。然既讀書。考論天人之際。究觀今古。其氣耿然不可下。又頗近酒。酒酣嗷喏。輒以誚其坐人。莫識也。既以窮死。縣人乃掘拾其所為獨樹園詩。鼠璞詞各一卷。為刊版以行。鈞故寡與。獨與其同縣翁春交善。翁春字曙鳩。一字辨登。亦字澹生。別自號石鰲。不知其家世。小時與母沈居北郭外。菜花溼。挑菜自食。偶過里塾門外。里塾兒負課。春為誦之。如流水。塾師怪問。則曰。顧常往來。聞師教讀。習之耳。指其字。初不識。春便從塾師乞問大義。歸而以意推測。句讀。遂自能讀書。又別丐市肆書筆。從牆壁間畫字。人以是誇詫之。聞於縣貢生姚培謙。姚故以著述自名家。多藏帙。奇愛春畀。以所宜讀書。且周給之。使卒學。已而里人沈大成致之門下。講以所聞。遂能詩。於詩好元人。不言李杜。於作字。好孫過庭。其為人耿介。與鈞相似。博覽感激豪宕。不如鈞。而周謹亦過之。對客清坐。如木佛。寡言笑。有招之飲。靡不往。歲常拜培謙大城墓下。與其里人沈

梅相交懽餘三十年。生館其家。死殯其室。梅亦雅操士也。先時大學士諸城劉公。以侍郎督視學。政行縣。聞其名。欲見之。不可。公乃手書為卷。以贈之。旁縣王侍郎昶。中歲假歸。禮先於春。春亦莫逆也。性篤孝。善事其母。不娶。無子。有同產弟。不知書。其故人門弟子。相與葬春。并葬春母。又哀校其所為。賞雨茅屋詩四卷。與鈞詩。偕行於世。

見王芭孫  
淵雅堂集。

### 錢繼升

繼升。錢氏昌其名也。居吳江之保障里。今屬震澤。崇禎八年。以選貢授郡通判。不就。歸。是時天下多盜。而含山盜最桀惡。繼升家饒於財。一日。有二人踵門云。奉主命。貸銀數千兩。必得以返。詢之。乃含山所遣也。繼升勞以酒食。為好言慰之。曰。銀不能卒備。幸緩數月。當齎至山中。其人約期而去。繼升念曰。盜不可藉之銀。且豺狼無饜時。不如以家之所有。募士守禦。庶幾全吾鄉里。因具狀請於官。得便宜從事。乃立格募兵。歲方饑。聞者先後至。家有木仆地。繼升言於眾曰。能舉此木者留。未幾。有崇明武學生黃扶搖等四人至。比皆黃姓。號曰四黃。遂命訓練曹伍。里人吳彥康等。亦別集壯丁。自衛。皆聽繼升指麾。含山盜惡。繼升負約。率其黨至。鉦鼓喧闐。若甚可畏者。里中武

士皆持兵彀弓指之。盜惶駭，詭言吾曹欲往木瀆取糧，不過假道貴邑，何紛紛為？繼升使謂之曰：爾既無意侵掠，何不藏爾兵器？盜不得已，舉兵器斂之。繼升縱兵奮擊，盜殲焉。久之，盜有沈判者，乘大舟，擁黃蓋，駐野泓蕩，聲言欲為含山報仇。繼升兵少，力不敵。時職方主事吳公易以兩都失守，倡義起兵，有家數千人，因抵職方借其兵。職方初難之，卒與舟師二百，而黃扶搖等率之以歸。繼升偵判船設砲，患之，遣人偽為乞人，至其船丐食，潛以鹽瀆滴礮中。及判發，礮皆不起。繼升用砲壞其船，遂獲判。先是扶搖獻計，謂盜來必乘舟，舟必蔽以葦席，若用絲附條而灼膏射之，則糜爛矣。從之。於是盜船盡焚，煙焰四起。李膏樂者，判黨之勇者也。繼升與搏戰，幾殆。有許某者，斬膏樂，懸其頭溪橋。繼升乃徐訊所獲之盜，殺其素為盜者，赦其脅從者。頃之，盜復夜入里中，不遂。自是不復至。聞藩閩繼升名，使以禮聘，謝不往。而吳職方敗走，大軍購之甚急，跡及繼升。繼升與吳彥康皆被逮。繼升有辭，得免。并彥康亦免。繼升與弟威皆能文，威中順治丁酉鄉試，以同榜有事，謫甯古塔。繼升亦牽連至京師，病卒。

見張士元嘉樹山房集

鄧觀灝

鄧君觀灝。萍鄉故家子。幼有至性。隨父悔庵公官京師。師授詩至蓼莪。輒泣。人異之。父遷蜀提刑。以巡鹽舊案。逮還論死。賴朝恩矜緩。繫圜三載。灝夙有句贖志。父慮其無濟也。潛督楊勤敏公。諗乃公為吏郤清介。官當不以貪敗。為灝謀者屢。乃徧走齊鄭燕趙間。嘗夜墮叢莽。狐鬼嗥嘯相逼。一僕劉章阻勿行。弗顧。遇獵火出。馬閉闕抵京。訴步軍統領阿果毅公。叱曰。爾擅入禁地。不畏死耶。命繫暗室。君度父無生理。誓自殞。守者一武弁。聞哭聲。詢故。義釋之。他日。復伺間。訴於相國傅忠勇公及阿公馬前。傅語阿曰。禡子冒譴救親。難能也。宜上請。阿亦惻然。二公取其辭入奏。得旨准贖。傳遣飛騎為孝子賀。蓋深重之也。納餒入。父獲免。見劉鳳詒存悔齋集

### 周書昌

周先生永年。字書昌。濟南歷城人。結茅林汲泉側。因稱林汲山人。先生衣服飲食。聲色玩好。一不問。但喜買書。有賈客出入大姓故家。得書輒歸先生。凡積五萬卷。先生見收藏家易散。有感於曹石倉。及釋道藏。作儒藏說。約余買田築借書園。祠漢經師伏生等。聚書其中。招致來學。苦力屈不就。縣令胡德琳。延先生與青州李文藻同修歷城縣志。卽出其書。肆力搜討。既成。學士朱筠。目以詳慎。後成進士。欲入山治儀禮。

被徵纂修四庫書。授翰林院編修。文淵閣校理。當是時。海內學士集輦下。皆欲納交。投刺踵門。然深相知者。新安程晉芳。歸安丁亦餘姚邵晉涵。數人而已。借館上書。為四部考。傭書工十人。日鈔數十紙。盛夏。燒燈校治。會禁借官書。遂罷。先生於經史百氏之言。覽括畧盡。觀其大義。警章不句。自謂文拙。不存稿。故歿後無傳焉。見掛轅晚學集。

### 吳大始

吳君諱宗元。字大始。號岱芝。浙江石門縣人也。少敦至性。砥節勵學。以歲貢生終。嘗遊省會。天台齊息園師主教敷文書院。執經從焉。書院居萬松山頂。有一樓居。極高。虛君榻其上。每日讀經史雜文。至午刻。則始去。取工部全集朗誦之。聲徹遠近。每首必百遍。隨以丹鉛。率至夜分屏止。次日復然。先是君熟於明詩綜。所作詩。酷肖高青邱。李崆峒諸家。嘗錄以正於息園師。評點訖。謂曰。詩儘佳矣。百尺竿頭。可進步乎。李杜韓蘇四家外。勿寓目可也。自是遂專志杜陵。性奇偉。不羈。不好與凡人倚伍。嘗與朱笠亭。沈雲樹。蔡漫叟諸先生相唱和。餘弗顧也。嘗言吾少時。曾作一圖。橫劍三尺。南華翁居左。指說之一虎。士類荆軻者。居右。聳聽已居中央。作撫掌大笑狀。名曰說劍圖。其雄致如此。既專精讀書。不下樓者月餘。忽值意有所會。輒入西湖山中。經宿。

不返。每談及浙東山水如天台雁宕赤松四明諸勝輒勃勃然欲往然卒不果以老親在堂故也。自壬午至甲辰迎鑿獻賦者三。受知於寶東臬李鶴峰錢稼軒諸學使。復攜詩質於沈歸愚先生。名稱藉然屢擯棘闈。一不以介意。謂子侄輩曰。吾以勵汝曹耳。通塞之故命也。亦時也。吾不得而知之矣。中年後頗出游。南浮巖瀨北抵燕臺。東至登萊瀕海諸郡。游蹤所至慷慨懷古。一寓於詩。客囊如葉不計也。歲戊申。子文照領鄉薦赴都門。君欣然束裝同往。泊舟京口。抵焦山。大雪忽作。遂冒雪登岸。冰凝路滑。截雙竹作杖。歷崎嶇而上。懸崖冰箸長二三尺許。拂之鏗然有聲。乃觀周鼎。讀瘞鶴銘。謁焦先生像。俯眺海門。周覽嵯壑。比返舟中。已濕透重綿矣。其豪曠好游。蓋天性然也。鄒曉屏先生聘入山右學使幕。得一佳卷。輒朗誦不去手。素不讀律。而明敏有斷制。鄒公每以大案相質。未嘗不心折。晚歲家居。栽花課孫。里中以詩文就正者踵相接。有片長。津津樂道。預修嘉興府志。表揚節義。不下百餘人。精醫理。頗諳內典。耽心禪悅。手輯四十二章經。施諸寺院。蓋閱歷既久。進詣益精。從前雄傑之氣。爾時淡泊之神。不知者謂為殊趣。在君則一以視之而已。歲庚申七月初十日。微疾正襟端坐而逝。年六十九。有南樓稿若干卷。

吳祿室

吳翁名祿室。字在中。涇縣茂林都人也。父一橋。早卒。母楊氏。遺腹生翁。家貧廢讀。有戚某攜之至南邑。為人襄質。庫事會計。旁午無少閒。然念念不忘母氏。一夕薄暮。陰雨中。蒼頭持書至。翁色變。以為吾母病矣。啓緘讀之。信然。即擬疾馳歸。其肆主慰之曰。君固當速歸。奈大雨如注。何。翁不聽。持燈就道行。至次晚。則前溪阻隔。大水汪洋。求一筏不可得。天愈昏黑。居人動色。以公無渡河為戒。翁曰。不念母。何以子為。燭跋易以新。光散亂不甚明。遂脫衣履。擊諸手。徑衝波去。初祇沒脛。愈進愈深。至中流。燈失。水沸騰。直際頸領。翁號泣曰。天不使我見母耶。俄而身體上竦。浮出水面。兩足跟。如有物度之立者。忽撞入淺瀨。則安然登岸矣。旋着濕衣履。魁行。踉蹌抵其家。叩門入省母。母曰。苦我兒矣。日者言我年盡五十一。今已及矣。忽得腫脹疾。飲藥無效。殆將不起耳。有頃醫至。診視訖曰。疾不可為也。翁聞之。痛迫於中。俯首雨泣。旋閃入厨下。袖一刀。詣無人處。以口嚙左股。刃之。得肉寸餘。轟切如泥。暗投烹鼎。雜諸羹。以進。母嚙之。疾頓瘳。自後更二十有一年。至乾隆乙卯。母始卒。初翁受創後。痛而踣。半晌時。強起。漬血痕。裹以布巾。甫畢。鄰人見翁神色異常。時詢之。不告。以實。嗣後見翁舉



臂無力。且不時病。伺而觀其裸。堅詢始知之。仍戒勿洩。見朱龍集

許剛中

君諱穆宗。字剛中。號履亭。姓許氏。世為海寧人。早失父。家貧。乃輟儒業。習賈。無一椽之居。賃屋於吏部橋南。奉其母。而身往來吳越間。嘗雪夜步行百里。并日而餐。母供養備已。而家日裕。作室龍山之麓。橋名其堂曰經德樓。曰尊樓。塾曰汲修。以孝友忠信教其子。延名師誨之。學皆克有成。君貧時。嘗夜得遺金於途。伺其人而還之。為人賈。有誤界以五十金者。數百里返之。其營宅也。里人有將構爨者。潛以骨一罌。置其下。君見之。惻然命改地。瘞之。加蓋薦馬。其人大感愧。一夕移之去。且詣君謝。君終身不言其人。嘗就相人相。曰公瘦形鵠立。音聲越然。身有二十餘子。如丹砂。法當立其家。然有大厄。今且至已。熟視指之曰。此所謂陰陽文免矣。未幾鄰家火。火延三十餘家。比至經德堂。風返火息。有於火中見神人。五尊火行。至君之屋而沒。羣以為陰德之致云。見張惠言茗柯文集

僧如鵬

如鵬不知其何處僧。宋先生大樽遇之天台。則以為台山僧矣。舊傳台山中虎不噬



生肉。麋鹿見人不驚。古以為佛國。諸老僧多葷茅居之。狀甚癯。問其年。搖首不答。與之金帛。無受者。是既可怪。今聞如鵬。偉然七尺。軀目如巨星。語纒纒。喉舌如古吐。今何為而亦於是邪。入其茅。不設門戶。聞其吟聲。石裂而谷響。紙稿投大鐵甕。人鮮得見之。天下僧寺。天台方廣尤多。度前代大藏佛書。如鵬借之觀。期月以徧。茅中無食具。日或飲一甌水。盡一溢米。或數日否。其貌益壯。豈不更怪矣哉。見陳誠白雲文集

### 何梅生

君名承先。字梅生。甘肅武威人。幼而夷曠。邈然高厲。嗜讀書。熟于注疏。尤精綜史漢。凡鄭賈之說。顏李之注。皆言之鑿鑿。如以弗貫肉。乾隆乙卯鄉試。經題為詩小戎首章之前六句。典試者苦不得佳構。從落卷中。搜獲君文。考據獨詳。數激賞之。視所謂四書制義。皆超逸。非俗手可辦。乃拔第一。為解元。時典試者。湖南羅翰林修源也。得君喜甚。延譽公卿間。而其名日起。嘉慶乙丑成進士。改庶吉士。戊辰散館。授知縣。官福建長泰。君於事。御之以簡。時或登山臨水。賦詩自娛。而尤湛于酒。庚午調南安。未抵任。病卒。繼君任者。曰鳳。有神降其署。畫字槃沙中。為詞一闕。署梅生。眾懼曰。梅生先生來也。先生喜飲。曷飲乎。則又書曰。予為廬江城隍神。將至某處。鞠業。忽忽不暇。

飲見張樹養素堂集

沈杞望

沈祖惠字杞望號虹舟烏程之馬要人父在茂贊吳江平望李氏祖惠生而母卒育於外王父母仍為外氏贅壻外氏無嗣因冒李姓乾隆壬申領解第一其秋會試第二改復沈姓除江西高安縣知縣祖惠殫精帖括弱冠有聲屢困場屋年三十四游陝甘學政幕中始銳意詞章為西征賦兩年乃成賦既脫稿并自注合一萬五千六百四十許字賅洽閎深上揜潘岳交河王侍郎蘭生曰千餘年鉅製也其詩亦各體穩稱五律尤高渾峭拔逼真唐音年四十一而倦游以帖括授徒鄉里潛心理學感薄詞章先時彙本彙之敝麓與並世名流絕不通聞問並世名流亦鮮或稱道之登第後為四書講義自負理學正宗復不為時論所重以故祖惠畢生無詞章名亦無理學名及卒其高弟子王元文蒐輯遺詩得三秦游草四卷洞庭游草一卷拾存草二卷經進草一卷謀付梓不果余得之合編為虹舟集見嚴可均鐵橫漫稿

吳星萃

吳君諱星萃字東聯陽湖馬蹟山人父桂枝以名進士為經師受業弟子數百人修

撰金先生榜。太保大學士董公誥其尤著也。君未冠即補學官弟子。己而依董太保於京師。凡客京師三十年。屢試不售。欲南旋。因循不果。年未三十。即喪婦。無子。亦不更娶。有友人姚君者。官曹縣令。請於太保。偕君而東。嘉慶十八年。林清之黨將為亂。金鄉令吳塔捕得崔士俊。即羽檄各縣緝賊。至曹。姚令不之信。君力陳利害。並為設鉤。致方略甚具。姚意稍動。而吏役多賊黨。奔告其魁。知事洩。遂先期攻縣署。入之急求得君。叱曰。勸令捕我輩者汝耶。君曰。然。恨令早不聽我言。使汝曹猖獗至此。吾年七十有二。豈畏死耶。賊益憤。攢刺之。被數十創。姚令一家亦遇害。賊去。有營兵數輩至。君臥積屍中。見之呼曰。吾已無生理。幸加刃。令我即死。兵憐之。為斷氣管。乃絕。吳塔既得崔士俊。旋誅其黨數十人。金鄉獲全。遣人聞行。求得君屍。棺斂如禮。請以君名附奏得旨。入祀忠義祠。見陸繼輅崇百藥齋集

### 樵煙野客

盛子履有樵煙野客傳云。樵煙野客者。居於韜光靈隱之間。丙子秋。余過西湖冷泉亭。憩飛來峰下。聞呼猿洞口。有吟聲。攀崖入。有屋數椽。童子倚門。余問吟詩者誰。不對。請見不許。固強之。乃導余入。松毛為籬。藤蘿屈曲。屋小而深。筆牀茶竈。位置整潔。

一客凭几而吟。年六十許。頽然秀削。清而不枯。鬚髮蒼然。衣冠甚古。揖余問所從來。余曰。聞吟聲。故采。客曰。余不知詩。何能吟。且請坐。命童子煮茶。談吐極清遠。其音吳音也。叩以姓氏。不答。亦不問余姓氏。余心異之。見几上真山居圖卷。自題樵煙野客。即呼之曰樵煙。客喜謂余解人。見余扇頭自書秋草詩。頗欣賞。取別紙手錄。字法秀勁。邁逸於宋大家中。絕似山谷。余更異之。客呼余為秋草君。薄暝。余辭去。客亦不復留。越三日。余復造焉。則客已先坐冷泉亭。邀至舊所居處。淪茗溫酒。摘園蔬烹池魚。殷勤勸餐。笑語款洽。酒半酣。縱談史傳。上下千古。如示諸掌。兼及文章詞賦。升降源流。羅列淹貫。而於近人著述。皆似無足當意者。余大驚。索其詩文。則皆隨手散棄。惟示和余秋草詩四首。讀之。琅琅然。瑟瑟然而頗有哀悵之意。余屢詢之。客曰。僕非逃世者流。少年亦嘗弋獵浮譽。中年人事多故。鬱鬱不樂。所居近市。往來皆駟僮。無可談者。余乃攜書一篋。放懷山水。作詩文以自娛。此處離家不過二三百里。然已六七年不歸矣。余為默然。客曰。君可作竟日談。遂欣然留宿。自童子外。別無他僕。門庭闕然。一樽相對。意致閒暇。余又以里居姓氏問。客曰。君何俗見之。未除也。竟不告。明日。余歸。客吟孟襄陽待到重陽日。還來就菊花之句。一笑而別。翌日。余復往。別落葉滿。

階。蓬門深掩。立於叢篁雜樹中。見水聲潺潺過澗。一僧從澗後出。余問客何在。僧曰。客為誰。曰。樵煙。曰。樵煙為誰。余指其廬。僧曰。是僭童子。買小舫。載書篋。移居於雲棲寺後矣。余悵快而歸。夜不成寐。晨起策蹇孤往。歷梵村。入雲棲深處。徧問之。茫然不知山中有是人也。見臧大士蘊素閣集。

### 王瘦山

瘦山王氏諱熾。字緝熙。華亭人。家亦貧。瘦山刻苦讀書。為學官弟子。授徒養其母。道光三年。夜霖雨。江以南皆澤國。松江尤甚。斗米錢五六百。瘦山脩脯不能餬其口。然堂上甘旨無少缺。未幾疫大作。母遺疾不起。不克斂。貸三十鎰。始成喪。然後不盥洗。不寢息。埃垢積首。泥生髮膚。搏膺而呼。悲酸結塞。一日。天未明。憑棺慟哭。退而自書曰。不孝子王熾。生無以為養。死無以為禮。以親喪故。累人不如死。即潛入後舍。啓其扉。扉臨河。自投於河而死。平明。家人起視。後舍扉啓。庭中闐無人。大駭。適買棉紗人來曰。吾見南門大張涇東岸白楊樹下。有一尸。麻衣草屨者。此其是耶。急覓之。則瘦山也。面如生。戚族賻以斂。皆痛哭。買棉紗人亦大哭。有吳司訓惕庵。倡義葬其母。并葬瘦山。卹其寡稚。月如干錢。見臧大士蘊素閣集。

許所望

許所望字叔翹。安徽懷遠縣諸生。工為詩。而通兵法。喜慷慨趨義。嘉慶壬戌冬。宿州亂。民王朝民李勝才破宿州。所望嘗率其戚屬王冠英出積粟三千石餉軍。且助平賊於陳家集。嘉慶癸酉秋九月。河南亂。民李文成據滑縣。內結林清。驚京師。其黨走山東。林清既伏誅。山東平。王師方會圍滑縣。兩江總督百齡駐徐州。安徽巡撫胡克家駐亳州。為江南防守。亳州有歸德人楊七郎者。盜魁也。擁眾引河集。其黨洪廣漢據保安山。與潁州亂。民沙占魁等互勾結。伺隙未動。胡中丞知所望名。以書招之。使帥鄉勇助防。勦所望集邱惠齡張國綱謝崇訓等十一人為隊長。率八百人至亳。乃畫策曰。楊七郎猛且狡。聞吾在軍。備且密。宜計誘之。命張國綱謝崇訓率健兒八人。偽為逃丐。投詣楊。楊果喜。越五日。誘至邱家集。楊忽疑曰。若為許所望來耶。時楊眾百餘人。崇訓出不意。斷楊左臂。眾大驚。張國綱疾呼曰。吾張國綱也。立刺殺數人。國綱萬人敵。與邱惠齡同攻破宿州城者。賊素震其名。遂大潰。所望率兵至。賊黨擁七郎奔。或謂七郎死于路云。於是保安山洪廣漢眾亦大潰。沙占魁等竄至永城白廟。所望追殺數人。會滑縣平。其餘黨來合。與亳賊南焚會亭。所望戰於公基湖。令列十火。

鎗土阜上。曰：賊至二百步發。令衆伏地勿動。曰：鎗發，乘煙突擊之。賊大潰，追數十里，斬獲無算。亳州罷防守，蓋不煩五營一弁一卒也。當百制府防守徐州時，儀徵縣屠倬率河南人張永祥團練鄉勇三百人，將助徐州防事。平，解去。張永祥嘗以鄉勇四百人擊破川楚賊於廬氏縣，議功補外委。張永祥不知書，而恂恂如讀書人，人呼之為張鐵鎗。云：謝崇訓以功授練潭汛，所望兩辭廬鳳道珠隆阿及胡中丞之叙功，以諸生應鄉試。見豫用光太舟文集

### 白廷英

白君諱廷英，字嶽鍾，始祖貞，興平人。前明漢中教授，遂家洋縣之仙里村。君讀書通大義，率妻子耕作養母。中年家漸饒，七十後復閱舊書不倦。數為適人排難解紛，而無所取。建宗祠，延師訓里中弟子。纂族約家法，意嚴巖不苟。乾隆乙卯，君年六十八，縣廷舉鄉飲酒之典。君力辭，未與。鄉人咸謂君之齒德固無愧也。是時湖北教匪縱橫，嘉慶丁巳臘月之末，由蜀渡漢江而北，約十餘萬，蹂躪終南之南，近山幾無完村。明年戊午春，督鄉人築村後之張家寨以避寇。二月二十四日，賊陷城東雍家寨，使人馳覘之，歸報狀。君熟視已寨，曰：吾寨庶幾免乎。厥後賊數萬突從東來，鄉人望風



股粟多不敢居寨上。寨上人不二三百。賊急攻。鎗矢雨下。君戒寨上人堅守。而賊衆大呼曰。逃為善。否且屠。衆莫固志。丁壯悉由塞而墜去。賊蟻附而登。君知不免。大罵。遂遇害。君之次子。筐君頭負去。賊逐之。筐倒。頭落山下。從弟廷才。廷揚亦抗不屈。俱戕且焚之。明日。舉家號哭求君尸。尸焦爛不可識。以右手駢指辨得之。頭不可得。諸子號呼禱祈山靈。得於谷底。次子婦李氏。同日刺死。又殺其二孫。寨之將陷也。有健者以石碎賊之腦。立死。或曰。君之姻黨張清。或曰。君之從孫德助之。從子文翠。被脅不降。至寨西廟。墜子。縛梧桐下。劓其腹。梧桐由是立枯。見岳震川賜葛堂集

### 魏興

興安新城城隍廟旁。有孝子。曰魏升。父成祥。母張氏。生二子。長魏興。次繼宗。成祥早歿。皆充伍鎮營。嘉慶二年。繼宗戰死。龍王溝。興以母年將八十。貧不能娶妻。遂退伍。樵傭以供母。嘉慶五六年間。歲凶。斗米過千錢。嘗易米為母作餐。而私食糟糠。腹常不果。今興年六十九。無以養。拆屋半間。賣瓦木易米。又賣屋後柑樹。安康廩生張鵬翼聞其事。欲親見狀。晨訪之。託言買柑樹。將入門。興阻之曰。母尚未起。令鵬翼從牆外望見焉。入門炊爨。了無欺曲。鵬翼往新城。每日自塾歸。過其廬。輒私窺之。見

魏興侍母。左右扶持。問燠寒。如孩提狀。因問其鄰童子。魏叟與其母。日何食。童子曰。興喫包穀。麩其母所食。麥麩也。鵬翼訝興目不識丁。人方厭其聾。事母乃能如此。方其壯年。能樵傭易食。今年衰。不賣屋樹。何待。賣屋樹後。又何物奉母耶。知府上元葉君莅任。鵬翼上書言其事。請以粟周之。葉公從所請。每月禮賜之粟。繼又捐廉為之區處。作長久計。使興母子飽餼。以為常。見岳震川賜萬堂集。

### 徐金霖

徐金霖字翔千。號湘坡。為長洲諸生。世居吳縣洞庭之東山。里人以徐夫子稱之。欽其行也。居父喪。哀毀骨立。母嚴太孺人。以悲痛成心疾。往往喜怒失常。嘗終夜不睡。惟聽人歌。始睡去。公於是令諸婢皆習歌。時或怒。盡斥諸婢去。命公及其弟諱文鵬者。歌公不能歌。取古詩。曼聲誦之。弟為之和。又以弟體弱。恐其以勞致疾。因請曰。是愚且音不佳。不如我善歌。太孺人領之。於是命公獨歌。每夜深。諸婢睡熟。公獨嗚咽不已。輒至達旦。或命之舞。輒奮袖低昂。作拍張狀。見顧純集。

### 汪良緒

孝子姓汪氏。名良緒。字繼武。吳江人。世居城中。其父邦楨。以好博破家。母張氏。直諫。

忤意為所逐。孝子日夜號泣，求返其母。父怒，并逐之。於是奉母至平望之戰河，依其妻父王某以居。久之，父窘困不能自存，亦來依其子。初，汪氏本素封，張亦饒裕。母雖被逐，尚攜其奩中物，值數百金。孝子為置田四十畝，以供養饒。至是，父又盡斥去其田，乃貧無立錙。惟賴孝子館穀以養。然孝子奉事惟謹，即與他人言，未嘗一語以父為非也。暑月多蟲，為父置帳，輒鬻之以償博進。孝子撤己之帳，以與父。父又鬻之，如是再四。孝子無如之何，則亦裸卧飽蟲。晨起，蟲跡斑斑，然徧其體。其妻欲為之假帳，度夏。孝子感然曰：吾父無帳，吾其忍安寢乎？其母抑鬱多病，孝子親侍湯藥，未嘗稍離母歿之歲，適館他所。聞母疾作，亟歸而河冰合，舟楫不通，徒步數十里，值津渡處履冰而過。見者皆股栗，蓋急于視母疾，不自知其蹈險也。其居母喪，哭泣無常，朝夕則寢地不稅經帶。雖寐必屢覺，覺則連呼阿母不止。鄰人聞者皆為流涕。如是久之，遂以毀致病，未及終喪而歿。歿後，人視其枕，則以麻布包土塊也。年二十有八，無子。一女尚幼，孝子能為詩及古文，有遺稿若干首。

見顧汝敬  
研漁莊集

壽州某孝子

壽州某孝子，生而父以歲凶出謀食，遂不返。孝子長，母告之。既貧，且足跡未嘗出里。

聞漠然無可為計。見其鄰有招魂者。私念虛空可以神氣致。乃於人靜後登野橋。四面呼父。半年後聞一而似有應聲。益疾呼之。又數月。聲漸近。久之若咫尺。乃問曰。吾爹耶。爹安在。曰。吾死矣。循聲往。骨可得也。明日裹飯而往。循聲行。竟夜三四十里。比曉而宿。連夜復行。三數日。聲止不前。比曉乃詢其里人。言姓名狀貌。僉曰。是某也。死四五年。已瘞某所。因發而抱其骨以歸。母方以孝子不返。屬里中求之。而孝子已負父骸至。乃大駭。羣稱孝子焉。嘗授州中人。令補載州志。久而忘其姓名矣。見李兆洛養一齋集

### 浦近倫

浦孝子。名恒。字近倫。常熟縣東北鄉。曰福山鎮。瀕海而俗橫悍。浦氏獨柔。恒至。孝子尤恂恂。如不勝衣。家貧。販於江北。一夕心悸。曰。吾父殆病矣。急航海。颶風陡作。檣帆摧折。前舟俱覆。榜人不知所為。孝子自操舟。徑渡。父果病亟。孝子事醫禱。目不交睫者十晝夜。到股進之。竟獲瘳。又數年。乃卒。孝子縛草墓側。日負販養母。夜則宿草舍中。值風雨。嚴坐達旦。人多憐之。孝子弗顧也。孝子年六十餘。每祭。奉括菴。未嘗不泣下。嫁其兩妹。析家具三之。曰。女弟猶弟耳。方父病亟時。鄰夜火。既延及矣。孝子以身蔽。父風猛甚。火忽越廬而過。左右鄰蕩如。而孝子家獨無恙。孝子父士瑜。善事母。數歲

時侍母食。日止粥一餐。士瑜食故緩。所持實空器。母察而憐之。近倫之孝。有自來矣。

見豫原湘  
天真閣集。

曲園居士曰。王藝齋家相名香堂集。亦有浦孝子傳。言父病。割股以進。母病。復割股。妻王氏。竟以哭姑死。其妹當母病革時。亦割股一門純孝。尤所難也。附著之。以補斯傳之缺。

### 呂德興

旌德廟首呂氏有樵而孝者。曰德興。以鬻薪為養。性質直。與人無狎。有不可。雖衆強之。弗能得。人號之曰冷面。惟事親則融融然。所居先世遺宅。與衆十數家分室而居。一日。宅中火起。衆盡出。孝子不見父所在。亦出。出而求其父不得。則冒火復入。見其父於煙焰中。欲負以出。而火延無路。父麾之曰。我已老。不得出數也。爾隻身犯火。可脫。顧我俱死。何益。孝子泣曰。父在火中。子焉有出之理。遂以身擁衛其父於所居室中。俄而室之四周盡燬。而此室獨完。孝子與父均無恙。人見其冒火入也。曰。是必死。相與歎息。見室未壞。異之。既得其狀。則皆曰。天相孝子。天相孝子。事在康熙十七年。今其室尚存。村人咸目其地曰火羅圍。室曰孝子居云。

見董桂敷  
白知室集。

戴兆笨

旌德留村有戴孝子名兆笨縫人也少隨其父以縫衣為業年十三母歿哀毀異常兒以父故時自節抑每忌日生朝則慘泣踰日事繼母如母既娶常執業隨父不離左右父病噎孝子亦自減飲食百計求所以療治者不得則剝肱肉糜以進卒不起孝子慟甚既葬廬於墓朝夕稽顙哭聞之者為之感愴墓距家三里許念繼母時歸省視止於中堂不入內妻出見但戒以善事養語無他及居墓者三年矣其情如一日里人時於暴風苦雨中見墓所若有神物來降者又有芝草之異以為孝德所感云

見董桂敷  
知堂集

程永傳

程孝子名永傳字子亮小字八十官世居婺源城西父宗裕服賈楚蜀間十餘年不歸無音問死生莫知也當父出門時孝子甫四歲家貧年十二即隨祖父習賈江右既而母及祖父相繼卒孝子年二十乃孑身走數千里尋其父旅食或乏絕既盡楚地入蜀抵重慶府詢之鄉人容其地者則其父實死於是六年矣孝子慟絕亟叩求其墓人曰初葬江南義冢後有故交石某以其地卑濕移至高原未審其處也孝子

則日泣從故葬處躋山越阻徧求之不可得返守故葬處晝夜哭有老僧導以禱神如其言依方步察以往距義冢蓋十數里高阜蔓草中一碣露出逼視之則其父姓氏里居具焉孝子跪而抱之曰吾父在此耶哀號不自己觀者為隕涕遂啟壙視棺前和字符合乃扶柩附舟東下舟中坐卧不離柩朝夕食必奠遇三峽大江彭蠡風濤之險輒撫棺哀籲於天既歸葬服喪三年於是邑中人皆稱程八十官孝子也觀

桂數自  
知堂集

### 江廷燦

江先生諱廷燦字英三號蓮峯系出蕭江先世自邑之江灣遷城東祖父以上皆未列士籍先生少讀書貧不能從師諸經皆自誦年十八為邑庠生乃肄業郡城紫陽書院從方遠瀄鄭炳也諸先生學為時文其文以前明隆萬啟禎諸名家為宗尺寸理法爰除枝葉獨樹質幹試輒黜終不改為人介直自生徒束脩外不妄取一錢先生為塾師神夷氣肅終日不出館舍督課有常講書詳盡無燕談之友歲首末離塾不過十日故生徒無曠業邑中稱良塾師者僉曰江先生江先生云見董桂敷  
自知堂集

蒼最錄卷十二終



蒼葢編卷十三

清 曲園居士纂

俞鎮璋

俞君諱鎮璋字佩廷號素園世居安徽婺源縣東鄉永川里遠祖臯宋末以春秋經學著聞入元不仕君少孤有兩兄一弟同鞠於母家壁立衣食皆母倚母晚病君夙夜侍既歿常思既遷居顏堂曰思恩雖耄述母常淚下初母命服賈無資後以才實著或貸之金乃鬻茶於粵東自後歲常之粵東粵東人士及諸商旅接君者咸信悅君稱曰大伯俞大伯俞里諺尊稱也君老不粵遊寄聲問俞大伯俞者猶歲時相繼商人重利君以義初鬻茶主於某後某虧洋人金諸商恐累易主去君曰故交也獨不去而是年洋總商事者適更代代者至與某前厚令諸洋人毋促其金售茶必自其出於是諸商去者復來某薄之而益重君君於是利亦倍家寔裕履約如寒素而豐於義里中立義倉君命諸子捐白金數千兩以倡大吏上君名予獎

見董桂敷自知堂集

方錦全

旌德方君錦全世居隱龍方氏故旌望也國初有字季玉五玉者兄弟皆好善君自隱

龍徙居版書。家不逾中人之產。而高樸惻隱。有其素風。年七十。偕妻汪氏進香九華。過太平縣許家礮河口。見山水驟漲。木橋被衝。縛筏以渡。有隨而漂沒者。盡然傷之。即欲易木以石。歸而省嗇衣食。計日儲資以待。至道光二年。思償宿願。而其地已有先君而為之者。今所建仰山橋是也。君乃慨然召其二子大廷大成。謂之曰。人之好善。誰不如我。人既為之。而我獨無所效乎。於是其所居村口。有長楓樹。河發源績溪。水勢較許家口稍殺。河身亦稍隘。而每逢春夏盛漲。其奔衝漂沒之患。則略同。君自以年老。舉所積資。畀二子建造石橋。且令速成之。以及身親覩為快。次年值大水。隄岸頽壞。工費更繁。君虞事之不集。遂得狂易疾。大廷等尅期於五年二月興工。橋成而君疾愈。蓋時年八十一矣。君之欲建許家岸橋也。志在必成。徒以歲之不易。力之未有閒。不成於彼。而卒成於此。太平麻川一名仙源。今以名是橋者。從其始願而稱之也。見胡永球求是堂文集

### 徐有章

徐孝子。名有章。字子簡。其先名履泰。自崑山縣移居吳中。考曰明。字自遠。明崇禎末。選拔貢生。遊都下。甲申之變。孝子生一年矣。明之兄吳庠生曰。時者。掣孝子隱居靈巖山。之象形。卷不復出。順治初。方需人才。令勝國貢舉人。並就吏部常調。孝子父明。為人所

持度不免。就注廣東瓊州府某縣教諭。寓書於兄。以妻子為託。時怒詢之曰。生無相見音聞。遂絕。而廣東為桂王據。洎其滅。尚可喜鎮之。後連亂不定。明之作止不可悉。久乃審其棄官為僧。蓋激於兄之言云。孝子稍長。墾吳江金文通公邸第。朝夕南嚮。悲戀曰。吾父何往乎。遂裹糧。若浙若閩。而廣之瀕海。若員山流土所治。靡不至。觸戈矛。犯蛇虎。三十餘年。無所聞。自是終身慘切。無伸眉日。傳道迹之士。往往萃滇蜀。然二方尤荒。懣孝子年六十矣。益令家人縫氈製跛躄。為萬里行計。會婦家金氏。授四川松茂道。招孝子往。則喜曰。吾自此穿褒斜。入劍閣關。由江油左擔。窮黑水。入番境。不得父。將自越雋。涉大渡。至兩林。盡滇界金沙之源。雞足之窟。必有遇。不則僵仆霧露。不空歸矣。呼畫師圖其貌。與家人訣而行。至松潘。未幾。病卒於城西南之大悲寺。其二子某某。挾圖迎其喪。臨發。往辭金氏。返見圖像。有書數行。云。形容憔悴。獨坐何為。紙上相逢。令人傷悲。又系七言詩四句。不署姓名。墨漬未乾也。驚問寺僧曰。適某寺老僧來。書此。自言亦姓徐。吳人。二子大駭。浼寺僧往跡之。曰。日暝。且城下鑰矣。比曉。叩其廬。應者曰。乍出未歸。歸無時也。二子欲止柩。期必遇金氏。再使人探之。則已打包去。因止之。曰。爾祖已離世網。度必不歸。且知爾父歿於此。適來即逝。豈而兄弟所冀遇乎。二子不得已。奉孝子之喪而

歸明竟不知所終。見沈欽韓幼學堂集。

### 陳紹蕃

陳翁名紹蕃字翰亭。世為常熟右族。父廷安既歿。奉母益虔。隆冬必溫被。俟寢而後即安。夏日則以井水貯盆。徧涼牀簟。數易不懈。或遺疾則衣不解帶。手治湯液以進。兄弟兩家。久析爨。各欲迎養。翁卻之。蓋其母非翁不樂。翁不見其母亦不樂也。壯歲鰥居。有勸續娶者。輒堅拒之。常謂人曰。我雖無婦。必不令我母甘旨有虧。正恐續者不能如我母之意。反累我母不適耳。嘗清曉謁廟。為母祈福。路過石梅。滑入深澗。攝衣上岸。衣不沾濡。人以為神明護祐。興福構造祖塋。督率工匠。晨出暮返。一夕夜半獨步歸。大風炬滅。時星月無光。迷失道。纍纍叢薄。傾跌數四。忽見燈光遠映。如有在前引之者。遂循其光而行。抵家。雞二唱矣。人尤以為孝感云。見王家相茗香堂集。

### 孫輔

孫先生名輔字仲山。幸西。其別號也。武威人。祖詔官湖北布政使。先生少孤。乾隆庚申。學使嵩大司馬拔貢成均。先生年未冠也。而劣於文。既以高等為貢生。鄉人竊議之。以為大司馬與方伯有舊。故膺此選。先生聞而媿焉。發憤為學。適遭母喪。廬於墓三年。晝

夜讀書不輟。學漸有成。而是時山左牛木齋先生運震宰平番。木齋號博學士。多就之者。先生喪既除。往從之學。同門為吳進士澄。吳孝廉鎮。吳秀才懋德。皆員僕才。善詩文。有三吳之稱。先生來學。既晚。質又魯。木齋未之奇也。而先生勤學。心專容寂。物不能搖。木齋每於課期。張盛宴演劇。約諸生先納卷者入座。文不就。不得與於酒課。每吳澄先納卷。文且佳。先生深思力銳。成文甚艱苦。終木齋之世。未獲一與於宴。而文亦佳。木齋嘗曰。吳越漢氣。輕清而上浮。孫仲山氣。重濁而下凝。固皆奇士。而孫之品。視吳為優。超溪澄字也。其人不羈。故木齋云。先生學既成。於制藝所造尤邃。以乾隆庚午領鄉薦。辛未成進士。是科狀元吳鴻雅。以制藝自負。見先生。又欣賞焉。欲彙梓其行書。為孫吳合稿。先生以吳文肥重。不之許也。而先生文名。自此噪四方矣。官廣東翁源知縣。性坦率。不能事上官。未幾罷去。浪遊江湖。凡數年。落拓以歸。歸而從學者日眾。先生隨其材之高下。而導之文。各就乎範。往往擬高科以去。嘗語及門。制義代聖賢立言。非體會聖賢之理。文未有不駁雜者。以駁雜之文。弋科第。幸得之矣。其人亦必駁雜。此世之大患也。先生名譽日崇。至今陝以西。言理學。必曰孫酉峯。酉峯名景烈。武功人。乾隆己未翰林。而言文學。則曰孫仲山。其為學者所推服如此。見潘挹奎集

孫福

孫孝子名福。元和縣人。生三歲。其父游雲南。久之。絕音耗。孝子稍有知識。從母索父。知其故。則唏然曰。是豈天上耶。兒當別母往矣。母以幼小之妄語也。呵止之。年十二。家日窘。急養母計。不得已。而傭於人。積貲十數年。遣嫁其妹。娶婦奉母。乃泣下。長跼請曰。兒終不能為無父人矣。婦侍姑。兒尋父矣。母亦泣下。止之曰。兒父之出。廿餘年矣。雲南路一萬餘里。父即生。兒能識耶。則是終不得遇父。兒不得父。兒且不歸。老身將寒餓死。孝子大慟。又一年。有赴官雲南者。復請於母。母無如之何。遂受傭。往抵雲南。徧問無知者。孝子於無人處。仰天泣。又時時從睡夢中躍起。或憐之。或笑之。一夕。忽夢有人如神人者。命孝子往見父。孝子違父時。方三歲。實不識父。而夢中神人為孝子言。從予往。當見父。則果見一老人。貌類己者。攬裾欲言。一哭而醒。以為積思所致也。後二日。於城南市肆。遇一老人。如所夢。詳問姓氏及鄉貫。真其父也。喜極而慟。慟定。言所夢。父乃定期偕孝子歸。蓋其父初至雲南。拙治生計。稍後。貨骨董為業。有所積。方切歸思。而又恐廿餘年中。人事變遷。歸且無以為家。比孝子至。知妻尚存。女已嫁。子有婦。則欣然欲歸。孝子辭其所傭者。奉父就道。而父於途中感危疾。死。見朱綬知止堂集

沈仁業

沈先生諱仁業字振先。吳縣人。父某。服賈安南。娶於會安地之林氏。林氏生二子一女。先生為長子。年八歲。隨父航海歸。而常以母羈海外為憾。父歿。先生年已長。乃圖父生象。渡海省母。凡二年。竟奉母及弟妹以歸。初賈人至安南。娶彼中女為婦者。不得攜婦入中國。先生之至會安。又值兵亂。林夫人攜子女竄山谷中。不食七日矣。先生求得之。而無所為計。有彼中人翁隊祿者。義而陰脫之。具舟。舟及海。颺作觸五指山。舟人恐手足失措。先生抱母泣。仰天而呼。有東風自空來。挾舟過山。達廣東之瓊州境。瓊州故海口。凡與安南貿遷者。皆由是入內地。國家設重鎮於此。譏察甚嚴。先生至瓊州。而外洋女不得入中國。上下傳覈。稽留久之。涕泗以請。莫應也。有老吏矜其狀。謂康熙間。曾有是事者。檢故文書中。得前案。乃得如例以歸。見朱欽知止堂集

李文淵

李文淵字靜叔。益都人。生九月而能言。早孤。嘗嘗其師。母邢。答之數十。乃折節讀書。以古人為師。視流輩。鮮當其意者。事母孝。母多疾。而靜叔知醫。故母尤倚之。歲丙戌。靜叔病。母持其手泣曰。爾死。我何生為。靜叔亦泣對曰。兒無患也。靜叔夢雨雹及己身。覺以



語妻。妻曰：聞姑言夢電者，喪父母，非吉徵也。未十日，母果病。靜叔彊起視藥，目不交睫者數日。母歿，病遂劇，自為文志其墓。又月餘死，既舍而蘇，然毀瘠日甚。明年春卜葬，其母有日矣。靜叔復病，自度不能送葬，日夕哭，至嘔血不止。比葬，舉家扶柩出，惟一醫者守之。靜叔不食，亦不語，閱三日卒。以衰經，斂年二十有六。靜叔之兄素伯，工古文詞，故靜叔亦好為古文。所著論辨說，凡二十餘篇。嘗言昌黎韓氏之說，後人陰祖而陽絀之。如云：性有三品，而後云所以為性者五。蓋已分氣質理義而二之矣。後人謂分氣質義理言性，自宋儒始，何也？呂東萊疑為兼愛，以其言一視同仁而未及篤近舉遠也。然則原人一篇，兼西銘之旨而過之矣。後人尊西銘而不及原人，何也？又言唐詩於本朝事，每無所忌諱，猶變雅之遺也。忠厚如宋而蘇子瞻以詩下獄，至白樂天為樂府諷時政，遂召入翰林。唐詩所以不可及者，豈獨字句之工哉？其議論有根據而不苟同，多類此。既歿，同學私謚之曰孝悼子。

現錢大所集

### 周顥

周山人顥，字晉瞻，號芷巖，世居嘉定城南。性磊落不羈，而未嘗與物忤。家無儋石儲，而未嘗以衣食累人。讀書不應科舉於畫，獨有神解，仿古賢山水人物，皆精妙。尤好畫竹。

興酣落筆。風枝雨葉。無不曲肖。嘉定自朱松鄰父子。以畫法刻竹。厥後有沈兼吳之璫。周乃始。諸人皆精其藝。山人更出新意。作山水樹石叢竹。用刀如用筆。不假稿本。自成邱壑。其皴法濃淡幻突。生動渾成。畫手所不能到者。能以寸鐵寫之。當時以為絕品。山人亦雅自負。其運刀時。若絲髮未稱意。雖垂成亦斧以斯之。山人多髯而善飲。自號髯痴。富人慕其畫。或致金幣。不即得。偶然欲畫。隨手與人。無矜色。人有延之者。或留半年數月。或到即辭去。嘗遊齊魯間。與單縣朱翁交相得。朱將往江南。山人附其舟歸。朱之兄方令嘉定。山人不知也。抵吳門。始知之。不告而歸。朱令異而訪之。避不見。朱去任。卒於蘇。乃幅巾往弔而哭之。其介持多此類。少時常病瘡。一夜醉歸。逢老叟。衣冠甚異。出一丸。咬之。五臟皆煖。忽失叟所在。經夕猶有異香。自是宿疾盡去。終身無纖介之疾。年八十餘。善飯健步。不異少年。乾隆三十八年卒。年八十九。族子笠。字牧山。亦工畫山水。晚以藝事遊淮揚間。諸公爭出重價購之。鄉人近日言畫者。稱大小周云。現錢大

### 胡其愛

孝子胡其愛。桐城人也。生不識詩書。時時為人力傭。而以其傭之直奉母。母中歲遺罷癘之疾。長卧牀褥。孝子常左右之。無違。自卧起。以至于飲食溲便。皆孝子躬自扶抱。一

身而百役靡不為也。家無升斗之儲。每晨起為母盥沐。烹飪進朝饌。乃敢出傭。其傭地稍遠不及炊。則出勺米付鄰媪。而叩首以祈其代爨。媪辭叩。則行數里外。遙致其拜焉。至夜必歸。歸則取母中裙襪。污自浣滌之。孝子衣履皆敝垢。而時致鮮肥供母。其在所傭之家。遇肉食。即不食。而請歸以遺其母。同列見其然。而分以餉之。輒不受。平生無所取於人。有與之者。必報母。又喜出觀遊。村鄰有優伶之劇。孝子每負母以趨。為蕪草安坐。候至夜分。人散。乃復負而還。母欲往宗親里黨之家。亦如之。孝子以生業之微。遂不娶。惟單獨一人。竭力以養。終其身。母陳氏以雍正八年病。至乾隆二十七年。乃以天年終。蓋前後三十餘年。而孝子奉之如一日也。母既歿。負土成墳。即墳旁挂片席而居。悽傷成疾。逾年癸未。孝子卒。見劉海峯集

### 張子焯

張翁子焯。字潛文。崑山陳墓人也。早歲有至行。父疾。剗臂肉和藥以進。父歿。祭祀必涕泣。及病垂絕。喃喃呼父不置也。篤於三族。患難共之。出私財。葬族人棺。凡六七。漆工祁天章者。年四十不娶。翁與之金。勸之娶。祁諾。受金而去。明日過祁。察其容甚戚。詰之。不肯告。詢其鄰。曰。嘻。是以金歸。而道遺。翁反。具金如前。往語之。曰。適有遺乎。曰。否。如

是者。三翁笑曰。汝欺我邪。出金袖中曰。此非汝遺何。祁大喜。以為誠然。道見賣菜傭。失百錢。忿欲死。翁呼傭至家。令家人平菜。而陰置百錢菜甲中。錢墮地。翁佯驚曰。爾錢乃在用。是家中落。而施不哀。一夕歲除。慨然語其妻曰。吾往歲除夕。每懷金二十兩。饋貧交。未嘗有餘。今饋損於前。而金不盡。言未既。有相訪者。出餘金予之。年饑。平價糶於其鄰。不計直也。陳墓人至今思之。見彭尺木集

陳黃中

陳和叔名黃中。吳縣諸生也。自少通敏。為學長於史。深究前代治亂往復所由。以達於當世之務。乾隆初。應博學鴻詞科。被黜。乃客遊南臨洞庭。登衡山。東浮錢唐。入閩。北馳驅燕齊。河岱間。當是時。上即位數年。銳意膺績。列聖治績。紹往古絕業。中外大臣承明德。爭廷致天下豪俊。虛己訪時政。闕失。而和叔為大學士。海算陳公所知。乃上書陳公。論用人理財治兵三大事。其用人之目有十。曰分科取人。曰慎擇舉主。曰重名節。曰辨邪正。曰加奉。曰汰冗員。曰寬法網。曰覈名實。曰懲貪。曰酌道里。以銓選。理財之目有六。曰定旂制。曰權錢幣。曰興西北之水利。曰輕征權。曰減漕粟。曰定鹽政。治兵之目有六。曰謹邊防。曰嚴海禁。曰練土兵。曰修軍器。曰簡帥臣。曰加月餉。陳公聽其言。頌之。詔求

骨鯁質樸之士。陳公欲舉和叔。應時和叔已去京師。屬其友沈椒園招以書。和叔辭焉。先是湖南巡撫馮公聞和叔名。辟置於府。土苗有小警。欲興師勦之。屬和叔奏草。和叔曰。此召亂也。撫而輯之。其可弗聽。和叔遂行。亡何苗叛。用兵期年。乃靖。已而漕督顧公。湖督孫公。閩撫王公。先後聘主章奏。援古證今。剴切詳盡。所奏或中格。每執奏至。再三得請。乃已。期於尊主庇民。不肯趨避形勢。揣摩風氣。為巧言。而諸公亦委心任用。不疑沮也。自諸公先後阻謝。和叔落落無所合。遂杜門不出。初至京師時。善山陰貢士胡天游。天游故竒士。負才氣。及見和叔。服其才。傾心相引。重天游豪蕩自喜。不肯循尺度。為勢要所排斥。竟窮死。和叔介然有節概。審去就。嚴取舍之辨。而其窮與天游等。年五十。九卒。居常恨宋史蕪雜。是非失平。刪其繁累。搜討先正舊聞。成宋史稿一百七十卷。又著新唐書刊誤。國朝諡法考。殿閣部院年表。督撫年表。十餘卷。詩文集四卷。其卒也。貧甚。不能治喪具。媼黨或以金賻者。妻張氏固卻之曰。奈何以貧故傷夫子義。價居以葬。

見彭尺  
木集

### 高士楨

高士楨。字廷三。山陰縣之梅里人。早孤而貧。與寡母弱弟居。稍長。入里塾。捧書泣曰。亡

不葬存不養。豈與羣兒咿唔時耶。遂舍去。從其鄉人之服賈者。業於杭。不數年。母棄。養念所業。惟杭土宜。遷地勿良也。始卜居杭之泥孩兒巷。留其弟守墳墓里中。歲時伏臘。度江拜掃。望松楸蔚然。泣數行下。又慨同產異居。相對歎歎。輒數日不忍別。幼既失學。中年頗悔恨。聞人讀書。輒傾耳聽。即不解。亦欣欣自得。尤喜談塞翁失馬。張公藝書百忍事。得意時。曳杖高歌。雖詞涉淺俚。率皆勉人為善語。笑之弗顧也。有鄰家屋將傾。謀以木楛之。而正當其門。礙出入。咸謂弗可許。笑曰。不能助之新。更速其壞耶。脫不虞。安知被壓者。非吾與若耶。卒許之。又數為輕薄子所侮。後其人無俚甚。來稱貸。慨然如所求。而亦無德色。人是以咸呼為高佛兒云。其初至杭也。衣被單寒。嘗雪夜卧破屋中。殘斃不能堪。曉視被上。已積素二三寸。故後雖豐臚。常舉往事語人。不敢浪擲一錢。以自奉。至義所當為。雖數十百金。不吝。又早失怙恃。風木之痛。不去於心。家人偶為製一鮮衣。設一美饌。輒揮涕屏去曰。吾先人未嘗衣此食此也。生平未嘗使人滌溺器。曰。奈何以不潔役人。遇老疾者乞食。必手自付與。視他丐獨多。曰。吾敬其老。於其疾也。或訾以過自貶削。輒操土音曰。吾土老。得至此。顧不知足耶。年七十有五。無疾終。乾隆某年月日也。士楨年四十時。苦澁溺不通。諸醫皆束手。有戚某。夜夢人曰。活高某者。湯打彈也。

明日物色之。得其人於花市街。一賣藥庸叟耳。語之故。湯曰。吾知賣吾藥而已。烏知醫。雖然。有鄭某者。余友也。蓋往致之。如其言。一劑而愈。硯沈亦然五

### 吳氏兄弟

合浦縣張王墟。多大岡。複嶺地。幽阻。產介獸。居民掘土取之。乾隆己丑歲。吳氏兄弟仲叔季。持器入山。發未及穴。虎突至。搏仲。齧其肩。口半張。叔以鋤擣其喉。鋤柄短。手入虎口。虎齧手。叔踣。季惶急。挺鋤柄。連擊虎背。骨折。弗能奮。季益力疾擊。鋤柄折。虎伏地。吼震林木。季力竭。手柄喘虎旁。仲叔負痛匍匐號。村人糾衆趨視。見季與虎交困。前搏虎。虎驚起。血淋漓。踉蹌曳尾。遁叢莽中。會日暮。衆莫能蹤。昇季歸。後數日。邑侯汪公龍岡過其地。召視創。且詢人虎相搏狀。感其篤兄弟義。給貲療之。復免其徭役焉。見李符清海門文鈔

### 莆田僧

莆田有官家子。年少出家。里之某寺中。寺前多龍眼。僧率資之以自給。已而為里中無賴子百十人所嫉。龍眼熟。盡而取之。寺僧弱。不能與爭。寺遂零落。是僧既出家。得其故憤然棄去。不知所往。閱三年。復歸寺。寺僧怪而問之。是僧曰。吾入少林學拳勇。將以禦暴也。及龍眼熟。無賴子數人復來取。是僧執之而不擊也。叱之曰。吾知若輩成羣有百



十人來繞吾寺。若輩恃衆也。若輩敢與我一人鬥力乎。若輩能勝吾。一寺前後龍眼。惟若輩取之。我一人勝若輩。若輩當服我。數人叩首去。約於某地鬥力。至期無賴輩執兵械以待。僧以一棍入揮之如折枝也。於是無賴子盡伏地。誓不敢繞寺。並戒以勿繞里中也。于是拳勇之名震莆田。然其技一試於此。後遂絕口不道。有少年嗜拳勇。且自負其技甚高。慕僧名。欲一得當於是僧。既見僧。絕口不言拳勇。少年曰。吾嗜拳勇甚。以是游於世。所游之地。莫余敵者。慕師久。敢以是謁師。師其以是教我。僧堅拒之。少年請益力。僧不得已。乃曰。試若技。或能當吾意。略以吾法示若可耳。少年大喜。踴躍試棍法。僧止之曰。若技甚俗。不足以進於是也。少年心不服。大言曰。師欺我。僧曰。我何為欺汝。汝棍圓而不方。濯而無毛。少年益不服曰。棍本圓而濯者也。奈何以為俗。僧曰。圓者方之濯者。毛之進乎技矣。少年曰。奚為而方。奚為而毛。僧曰。是難言也。若與我交。則知之矣。少年踴躍以棍與僧交。僧執一竿坐迎之。棍交竹竿。竹竿東。棍隨之東。欲西不得。西竹竿西。棍隨之西。欲東不得。東若膠之不可解。若風絮之不自主也。如是久之。竹竿忽上指。棍入雲霄。僧曰。是之為方。是之為毛。少年乃自愧其俗。不敢請。見汪縉江子文錄

補履先生

蘇州府治東。舊有學。廢為文信國祠。祠之西數十步。有僦屋半間。以居者。補履先生也。人持敗履往。則為補治。得錢以自給。先生少未嘗讀書。目不識字。以補履所入。從人問字。識一字。則餽以一錢。後遂能編讀羣書。門內橫白木板三四尺。置亂書。雜舊物其上。其屋壁間。亦多古書。以是從之游者。慕其好學。皆稱之曰補履先生。其讀書。略觀大意。未能深造也。然一言感觸。輒龜敏服膺。大要以不欺為本。與人言。輒引之於善。娓娓然若懸壺而瀉水也。里中童子。有來就學者。不問修脯。往往多至二三十人。然不加督責。任之而已。以是未久。輒散去。散則補履如故。卒年七十有五。姓錢名近仁。崑山人。觀汪

子文錄

### 打卦者

華先生兄弟。忘其名。做僮不羣。家無錫之蕩口。日哺微行。至某里東。見眾方圍聚一人。使打卦。其辭旨精奧。類有元解者。異而尾綴之。比歷數家。益信。其人出。華自後曳之。問焉。張目答曰。打卦者。固問答如前。華曰。做廬咫尺。能一見過乎。遂邀歸。問答間。意殊傲。晚尋復持其具欲去。華彊之坐。使子弟出拜。願受業門下。打卦者顧而嘻曰。乞子固足任。鼻比哉。不可。良久。乃許之。頃之。華姻親某。持盜刺來。華詳言。夜且被劫。盜刺者。盜將

劫巨室。先書名紙。使人投之。以為信。蓋緣古先禮後兵之意。且以耀其威武也。某述之。窘甚。華為言家有子弟師異人也。若請之。其可當有效。某從華往請。打卦者俛首自循其髮。久之曰。事亦易易。然使人慮不足任。必親往乃可。某曰。先生與若有故邪。打卦者喏曰。彼盜安得故我。我豈與盜故哉。怒欲弗往。某跪而泣。華亦前謝。乃往。既至。相其宅居曰。盜當從某至。取甄鬲列門外。為數壘。誡家人但闔戶寢。勿聲。家人陽諾之。實不敢寢。而打卦者寢自如。俄聞門外有人馬聲。隙窺之。見盜怒馬列炬劍戟摩戛聲錚然。前後約三五百人。及甄壘而騁旅繞之。自初更至達旦。迄不進。盡異之。打卦者亦寢。問盜來乎。曰來矣。來馬在。曰在門外繞甄壘。曰然則吾當出。遣之去。眾於門外設坐。擁之出。坐定。舉塵麾盜若寐。盡仆。顧曰。繩縛之來。眾出繩。次第反接之。驅至前跪。打卦者大言曰。男子負膂力。不能為國家效命。反棄身匪類。以污辱鄉里。誠一死不足以贖。吾今貸若。謂某可畀而百金。若再終不汝宥也。命解其縛。叱之去。打卦者亦取道歸。自館於華。饋遺贄幣。悉不受。彊之。則曰。吾今無事。比姑留於君。俟異日有用。當即取也。一日。趣華治具飯。以米四斛。云旦有客至。華如言具。至則二僧。儀狀雄偉。操閩音。始見皆拜伏。起而肅立。拱侍。命之坐。不敢坐。有問。則跪而對。打卦者語之曰。止。今豈可以昔比邪。吾之

在此汝具知之。汝之蹤迹。吾亦自無不知。各以心喻。不在瑣瑣也。可即去。勿再至。吾已為若一供矣。因出所具以食。僧袒衣大啖。俄頃而盡。摩其腹曰。徑飽。自此至彼三千里。可弗再餐也。起而為別。再拜。皆飲泣。打卦者亦黯然。僧遂行。打卦者留居華氏。凡十二年。後值九日。生徒盡散。遣去打卦者。獨與華兄弟俱。道遙隴畔。自得也。已指一地。問近屬誰氏。具答之曰。後可即葬我於是。華以其言為不祥。笑曰。何為修短有數。吾已盡明日矣。華兄弟驚而泣曰。自蒙先生不棄。承視杖履。有年所矣。然終不獲一識先生。里居姓氏。實所遺恨。今日月淹迫。先生甯忍竟無一言邪。打卦者亦泣曰。薄劣誠不足為長者道。必欲識者。吾腰帶間藏有小佩囊。歿後可取視之。翌日竟卒。啟視果有小佩囊。中帛書徑寸。語皆隱約。玩之。蓋鄭氏故臣。而隱憫以邀世者。僧當即其屬。將故在播遷。猶不失禮如此。乃具棺殮。禮葬之。如其指。別構特室。奉其主。世祀之。囊頗秘。不肯示人。聞至今尚存藏於家。

見毛燧傳  
味蓼初稿

### 海老人

昔傳海上翁。乘槎入天漢。見織女。得支機石而歸。迹涉虛無。初不深信。後有人從番舶還。訊所經歷。云航海。先至崑崙山麓。陟岸取水。賽神。乃發。仰眺崑崙。半入雲表。人罕至。

之莫測高廣。山半飛瀑。從天而下。奔流入海。去百里。砰訇聲如震雷。不可逼視。相傳為  
天河下游云。意其迂。猶未之信也。及游珠崖。與馮合谿。日夕盤桓。各述異事。合谿云。郡  
中有海老人者。才無家室。來往聚落間。相傳百有八十歲。貌如少艾。行步如飛鳥。不食  
不饑。多食不飽。叩其術。曰。無之。自言其故。則甚誕而不經。曰。壯時曾為海船舵師。一日。  
航海。連十二艘出港口。黑風暴作。漂泊星散。各不相知。老人艘入陰霾中。不計日夜。同  
舟大恐。籲天丐免。須臾風息波靜。遙見一島。兀立中流。艤舟就之。島上有尊官。下車擁  
蓋。竚立持冊候來舶。既維舟。尊官勅吏唱名。舟中估客無一遺者。各令登岸。乃點檢貨  
物。按籍貯庫。然後領眾見其國主。主大怒曰。若前許送十二艘來。今惟一至。得不大誤  
公事乎。遣人促之。還報曰。已逸矣。不可及矣。左右請曰。貢期迫近。不容少稽。盍選其最  
貴者。約而獻之。三請而主乃可。下令搜於內帑。次日。百珍七寶。絡繹登舟。明珠拱把。珊  
瑚專車。未嘗見也。將解纜。操舟之徒皆用彼人。來者無一與焉。老人止之曰。此吾舟也。  
爾國借之。爾人操之。萬一有失。將誰問乎。必吾與。乃可。否則有死而已。舟不可奪也。使  
不得已。還白其主。三復而後許之。僭然亦聞於舟中。彼人操船出沒巨浪中。如履平地。  
老人善之。行一日。見海中洲。高豎石碣。大榜其上曰。河海分界。弗解其義。遂順風揚帆。

湫流而上。遠矚水勢如疊嶂。如層灘。如梯階。之待登陟。漸近漸平矣。行一日。乃得安流。祥風搖曳。卿雲縹緲。夾岸居人。碧闌朱戶。男女耕織笑語。無異人間。老人茫然不知所。欲往問之。風迅帆疾。舟不為駐。行一日。夜曉起。見日光發海底。隱隱聞鼓吹聲。仰視城郭。金碧迴環。貝闕瓊宮。香雲鬢鬢。舟既泊岸。復有尊官檢視如前日狀。惟按籍呼名。老人弗與耳。尊官叱曰。此何地耶。凡夫乃與俱來。使者曰。此舟主也。不肯捨舟與我。以死請。主弗獲已。乃許之耳。尊官回奏。可其請。偕之升殿。殿上垂旒。宸衣儼若至尊。老人戰慄。頽首不敢視。須臾命坐賜饌。衆皆坐。惟老人久立。布末席。乃令之坐。坐定。上食。行酒。皆冠冕貴人。飲食非人間有也。老人跼蹐不自安。酒三行。乃辭出。尊官引至鷓首。謂老人曰。汝得至此。天幸也。食天厨食矣。既活汝命。且獲長生。老人諾諾致謝。究不知其所居也。既發舟。瞬息還至其國。國主不復見矣。老人索還前貨。及同舟之估客。使者以實告曰。此龍宮也。昨朝貢者。天帝釋也。與汝同舟。盡入水族。不可復還。惟汝幸食天食。得歸人間。延年住世。善保汝體。可成地仙。否則無病脫去耳。老人疑懼交集。固請不已。乃引至海濱石竇中。諸估客咸在焉。面目猶人也。四體已為魚鱗。相視墮淚。不能語矣。老人恐。乃乞歸。有人操一葉舟。招之使渡。遂附焉。令閉目。少頃抵岸。失舟所在。問其國。

土則交趾海濱也。恍惚其事。如夢初覺。值鄉人之商于交者。載之歸。越三甲子矣。其自述如此。他無可驗。惟食天厨膳。至今毛孔常有香氣。鄉有病癩者。與之宿。輒得瘥耳。始信天河下游。與海相接。逆流而上。復入天河。容或有之。因為之傳。用釋乘槎之疑。見釋

集

汪初

汪君名初。字絳人。先世徽人。遠祖某。始徙居杭。刑部主事。名憲者。君之祖。候選大理寺寺丞。名瑜者。君之父。君自少雋爽。未十歲。即耽吟咏。稍長。博習經史。十七歲。入邑庠。君母梁安人。山舟學士女姪也。學士精鑒賞。君數從譚論。學士喜。收弃前人題尺。而君獨愛詩。牋門攤書肆。有所見。必購得之。哀成十數。巨冊。國初諸老輩手蹟。皆得之。遇佳風日。輒焚香展誦。意翛然甚適。偶拈筆為山水小幅。清拔似元人。風雅士多樂與君交。君亦灑落自喜。大理君家素豐。既而中落。鬱鬱不自得。徙居吳門。又屢失意於省試。遂慨然入都。謀諸友人。輸貲為庫大使。試仕於蜀。君少工詞。所為滄江虹月詞。少司寇王蘭泉先生見而激賞。比入蜀。攬山川奇險。則詞益進。黃天蕩。馬當。潯陽。驛樓。諸懷古作。峭蕩蒼涼。深得騷雅遺意。廉使方公績。愛君才。招入幕中。文酒娛讌。不以屬吏待也。嘉慶十三年。



六月四川馬邊廳獐夷作亂。總督發兵勦捕。君從廉使往。凱旋上將吏功。君名在焉。以縣丞補用。而君遽歿矣。君體素羸。善病。能食酒。而飯不過一甌。其歿也。年纔三十有二。

見許宗彥鑑  
止水齋集

### 汪楊嚴三文學

諸生汪家禧。仁和人。楊鳳苞。嚴元照。歸安人。儀徵阮侍郎元督學浙江。三人並以高才生受知。嘉慶四年。侍郎巡撫浙江。立詒經精舍。招致三人在其中。家禧年最幼。而沈篤銳敏。好學尤甚。性謙下。常若不及。六一泉有神位數百。類皆前明湛族破家之遺老。莫知其蹤跡。家禧一一鈎考得之。撰六一泉神位考三篇。閱書積千餘種。其他所著。有意林翼。東里學人詩文集。鳳苞。早以西湖秋柳詞有名於時。為人性僻。不樂至城市。於經學小學。皆有根柢。尤熟諳明末事。嘗為南疆逸史跋十二篇。終身不娶。六十外卒。元照生而識字。四歲能作大書。八齡據案作諸體書。求書者盈戶外。江南以為奇童。性倜儻。不樂市井。所著有悔庵文鈔。詩鈔。詞鈔。娛親雅言。爾雅。匡名等書。三人者。皆方聞彊記。有守君子人也。楊。許宗彥為之傳。見許宗彥鑑  
止水齋文集

### 葛大賓

葛先生諱大賓字興森號寅軒先世自蘇州徙居湖南遂為湘鄉人幼而端重動止異於常兒長而益自檢制終日危坐言笑不妄盛暑不袒焚香把卷默識微吟性耐劇飲雖醉不亂或久無酒終亦不索怡然若有以自得也乾隆之末海內文人以靡麗辯博相高昆明錢南園侍御澧獨以剛方立朝視學湖南以正誼篤行風楚之人所取率多端士先生既受知於錢公補縣學生員益折節自繩跬步必衷於古訓學徒遊其門則先教之以忠孝大節下至飲食起居出處語默取與毫釐各有法式從則貞吉違則耻辱至不得齒於人聽者往往汗下先生四歲喪父哀毀若成人年十三值父忌日出主以祭主動仆地粉面剝落脫去葛字微露周字蓋木工飾周姓廢主為之者也先生痛哭引咎告墓易主卜日乃祭事寡母左孺人也鉅細必躬疾必嘗藥生徒有餽必歸以獻嘗隆冬獨坐心動急自館所馳歸入門數呼母母方與仲兄負暄後院聞聲趨出而屋後山忽積壓坐席破碎里之人以為先生誠孝之所感也母歿勺飲不入口者五日既葬衰服終其身腰以下無復存寸縷兄弟五人既分居矣通負纍纍無以自存先生則請於母復同居如初即有所入絲髮不以自私兄弟歿則庀其喪無子為之立後道光二年朝廷開孝廉方正之科有司舉先生應詔或勸之一詣京師謁選先生曰是可

以躁求邪。十二年壬辰十月二十九日卒於家。春秋七十有一。配左氏前卒。時先生年  
纔三十有奇。終身不更娶。見曹文正公集。

蒼葢編卷十四

清 曲園居士纂

沈起

沈君諱起。初名方。好學。善屬文。工詩歌。通經史百家言。不拘箋注。能自出意解。皆成確論。家貧。冠折巾。衣襟裾不完。往往至日暮不能舉火。饑寒益自奮。時海甯查孝廉繼佐。負重名。傾動天下。士爭歸之。君一日叩孝廉之門而請見焉。孝廉與語。竒之。曰。吾相天下士多矣。無如君者。君亦曰。是真能知吾者。君之名於是大振。會閩中許公芳為學使者。君應試。卷越幅。乃揭編號餘紙。書曰。身本孤寒。年幾三十。無所見知。公人倫冰鑒。方遴選真才。而身又累越幅。良用自悼。然愛才如公。幸勿以微眚。束之高閣。許君得君。卷竒之。及見此紙。尤竒之。遂錄補博士弟子員。覆試日。故呼君。怵以威。君應對不屈。許益竒之。時年二十有八矣。自是試輒高等。查孝廉操選政。君實佐焉。已而孝廉曰。君當自出手眼。與世共見。書賈亦遂聘。選有臨秋等集。學者宗之。君素好竒。有直指某者。橫甚。按嘉禾郡守以下。皆膝行怵惕。謁文廟。命君講。君進攻乎異端。章曰。太祖高皇帝云云。直指倉皇出位。旁立。鞠躬屏息。終講不敢忤視。既欲構君。過不可得。又以知名士乃止。

甲申變聞。君痛哭出血。既聞馬阮所為。益憤甚。顧無可一用其奇者。乙酉六月。君病創。乃走東禪寺。慨然賦詩。若將以縊服終者。因更其名。而字曰墨庵。世遂稱墨公云。君既棄世。益肆力於文。以自成其一家言。拔新領異。探幽抉奧。莫不羽翼六經。而文勢縱橫。不可方物。江左名士。咸推重焉。君常曰。明之亡也。不亡於閹賊。而亡於東廠。因作明書傳集。更原禍始。絕筆於成化十二年秋。始設西廠。又學園集八卷。大易測詩逆。春秋經傳引。四書慎思錄。各一卷。測杜少陵詩一卷。今國語八卷。續集一卷。詩存。資暇錄。各一卷。宗門近錄二卷。康熙二十六年七月十六日卒。年七十一。天水法嗣如庵。經理其喪。葬某都某鄉。在東禪寺之東南隅。題曰。故明秀才墨庵沈公之塔。見曾道扶集。

### 蔣之翹

秀水聞溪。為江浙接壤。其族大者。為陶氏。王氏。若蔣氏。無聞焉。至啓禎朝。有將處士者。與俗殊尚。孤清刻苦。家多藏書。博古自好。而不遇於時。當弱冠。應小試。為姦人所誘。遂陷於理。聖誤終其身。益杜門讀書。通五經之學。裹糧至南都。遊於焦弱侯先生之門。學益進。而處士務自韜晦。海內未有知之者也。年三十。注釋離騷。鐫行於世。識者翕然稱之。而處士之名始著。復訂定晉書。乙注其謬誤。漳浦黃石齋先生見之。嗟賞。于是天下

咸購是書。而處士之名益著。及年四十。復綜次韓柳集。據文箋注。悉考之新舊唐書。逾年。書成。俄當鼎革。其板質之他郡。成帙鮮少。學者求之。不即得。價益騰踊。處士之名復大著。自兵燹以後。聞溪災。資業傾廢。遷處不常。漸至貧困。因下帷以授生徒。生徒豔於時尚。處士必教以經史。及先輩名文。生徒相率遁去。而處士益困。旋始變計。志圖貿易。念先世以貿絲為業。遂操作於權衡之中。凡貿易之術。主客往來。主人務為權詞詭說。曲致殷勤。以誘致羣客。處士耻之。立言必誠。必信。欲以移風易俗。未幾。巨商大客皆散去。就他賈。而處士益大困。久之。欲盡燬其書籍。自念非天下名流。能通羣籍者。我不輕授也。俄秋。嶽曹公以憲副歸里。夙慕隱德。下文於處士。言論相洽。隨以所藏書歸於曹公。公得書。報以兼金。得免於困。處士既受金。即閉關不與世往還。同里陶孝廉子襄。筮仕景陵令。將之楚。欲就問景陵風土人物。及為政大端。不得入。乃絕垣而與語。聞者怪之。提戶二年。蒐葺携李一郡諸名集。自洪永訖啓禎。采定詩歌若干卷。題曰携李詩乘。郡之高賢大良。貞夫隱士。得藉以表見。其有功於携李人物。為甚大也。自詩乘告成。始啓關延客。繕寫副本。藏於家。越兩年而處士歿矣。處士名之翹。字楚樞。別號石林。生於明萬曆甲辰。歿于今康熙丁未。年六十有四。其詩歌自甲申以前。名曰甲申集。後之所

作名曰甲申後集。處士自注騷後。欲髣髴三閭遺迹。擔簦入楚。游南嶽。覽三湘七澤之勝。隨所感觸。往往見之於詩。故集中楚詩為多。見沈墨庵集

史以慎

史孝廉諱以慎。字真常。任邗人也。幼穎慧。日誦千言。年十七。中前明庚午順天鄉試。數上公車。不第。甲申後。絕意進取。顏其堂曰粥若山房。讀書賦詩其中。累旬日不出。苦介寡合。同邑惟劉常也。心一兄弟。及殷擴四李性符相友善。聚則分題命酒。不及世事。晚慕竹林諸人。高自脫略。使酒作達。遇飲必醉。醉必發狂。或歌或哭。跳擲拋擊。傾杯倒瀉。淋漓霑濡。人厭避之。呼為酒狂。或露頂行街市間。逢人輒問我醉否。或言醉則怒。未醉則曰與我飲。一夕。同殷李諸人飲醉。乘城見支更吏大呼曰殺殺。卒以為賊也。奔告邑令。令倉卒偕數役。弓刀來捕。至城悄然。惟聞軒聲相和而已。乃以燭照劉枕戶。限臥樓中。吐痕宛然。殷坐倚窗下。孝廉伏城堞。垂頭向外而睡。令曰飲何乃至此。命役分扶歸舍。他日過徐金吾。呼飲。時釀熟未壓。就瓮挹而飲之。孝廉曰牛欺吾醉耶。以糜作酒。傾之馬槽中。即坐槽上。歌老驥伏櫪志在千里。慷慨悲壯。未有也。又入張別駕舍。延客未集。陳設甚都。主人望見避去。孝廉徑詣爐。取酒獨酌。張僮過。強牽問客。僅以某對。



孝廉大罵曰。往延史公。不如是。以彼位高多金耶。掀衣出醜穢。灑漫堂中而去。其醉狂多類此。然性至孝。事母劉孺人。依戀如嬰兒。家甚貧。供母務求甘旨。夜必上堂問孺人安。侍婢答曰安。然後歸寢。雖極醉。不失常儀。親友知其然。值狂發。謬以家嫗出呼曰。孺人安。君醉可睡去。孝廉輒俛伏。移時成眠。亦足見其天性矣。歲荒。家用不繼。隔日一舉火。未嘗告人。邑令翁年矣。賢者也。聞而餽之粟。孝廉曰。此活卑田院中人物也。甯可入史公腹。辭不受。其介若此。歲己巳。以疾卒。生平著作多。乘醉為之。醒亦略不收檢。散失不存。惟李性符齋中藏其粥若山房詩一冊。雜文十餘首。見麗雪崖集

### 藍忠

藍忠字宜侯。福建漳浦人也。生有膂力。讀書知大義。能孝於親。配卓孺人。尤盡婦道。宗族稱之。所居村曰墩內。在萬山之中。故有虎患。歲甲子。有巨虎。竒橫。往來百里內。傷人不可勝計。臘月十二日。抵某社。為伏弩所傷。甚憤。四顧無人。跳踉大叫。聲裂山谷。所觸草木皆糜爛。直奔墩內村。過土地神廟。張牙舞爪。咬泥像碎之。居民閉戶。懾息。莫敢有出聲者。公父元章。叔父裕公。比屋而居。時漏下可二鼓。皆已熟睡。虎既碎土地神。猶咆哮不肯已。衝撲附近人家。倒某門。攫二豕咬之。裕公夢中。大喊虎怒。撲其門。以世居山

中防虎患。門內植二柱。衛橫木擊之。虎竭力衝撲。不可以入。裕公恐。益大喊。虎聞喊聲。益大怒。狂跳登屋。破屋桷直下。斃裕公。糜爛其體。公父元章公聞弟有虎患。發聲助喊。虎復狂跳破公屋。撲元章公仆地。公持長刀。直前鬪虎。卓孺人攜杆從之。虎舍父撲公。公舉刀刺虎中其咽喉。及入腹中三尺許。拔刀不得出。手餘脫柄。虎負痛復撲公。孺人從後抱虎。雙手搯虎頸。虎內既重創。不能自脫。公持手中柄連擊數下。惶急中。卒無以斃虎。孺人呼曰斧。公急從門後取斧。竭力連劈之。比雞鳴。夫婦氣力皆疲。瞪目熟視。則虎已死矣。急視父尚卧地呻吟。乃共扶入寢所。以藥敷治之。天明。村人屠虎得肉二百有餘斤。越翌日。元章公竟死。公及孺人哀痛急切。喪葬悉如禮。觀者莫不下淚。里中父老士大夫。謀欲白其事於令長。請以上聞。公泣且謝曰。忠不孝。獲罪於天。致使父叔喪於非命。忠雖倖留殘生。此心已死久矣。若又因以為名。是幸災而樂禍。忠尚得為人類乎。請謝尊長。切勿復言殺虎事。諸父老持之再三。公辭益力。僉曰。姑置之。無傷孝子心也。天道有知。大節豈終泯沒。尚留以有待焉。公長于韜略。後為武諸生以卒。見藍鼎元鹿洲初稿。

### 徐夢麒

徐夢麒字忠移。潮陽人。少孤。從叔父明經。轍受業。博極羣書。以五經中辛卯副車。甲午

登賢書。性剛方。不屑治產業。家貧甚。處之泰然。所得脩脯。悉與轍子均分。事叔母如母。邑人推孝友焉。先是麒為諸生。教授達濠。有寒士陳某。邑之華里東人。亦訓蒙於其地。兩人交相善也。已而陳病且死。與麒訣曰。死不足惜。但無後。負不孝罪耳。昔有某蚤婦。一男頗佳。願為某嗣。有成議。今已矣。言訖。嗚咽而卒。家不能具殯殮。麒拮据為之經營。寔焉。訪所謂蚤婦男者。則陳外遇產也。笑且詈曰。豎子。此不切事。今死矣。弗足責。無後為大。猶愈於他人子也。詢其狀。非六金不可。麒徧貸親朋。得金六。取其子。躬抱至陳家。里人聞輿中有呱呱而泣者。以為女客來矣。至門。停輿。皆駭愕。不知為誰氏親眷。趨視。輿夫揭簾。見抱兒出者。則龐然長鬚。昂臧一丈夫也。里人皆大笑。麒從容呼其父母。告以故。舉兒昇之。里人皆感激泣下。相謂曰。此義人也。麒仍時省視。周其困乏。令兒已成立。生孫矣。麒生平慷慨好義。大都類此。見藍鼎元鹿洲初稿。

盧和

盧和。潮州靖海廳人。居惠來縣東郊塗城。身長七尺。顴面長須。為邑壯丁。順治乙酉。林學賢為寇。攻縣城。圍困數月。援兵莫至。內外信息不通。縣令沈維煌與紳士謀求救。夜召和入計事。命突圍赴郡乞師。和曰。諾。胸藏血書。懷二鵠。從城南絕出。夜暗如墨。人

對面不相見。和匍匐行十五里。至神前。遵海而東。從守禦所。過潮陽。入郡。至則放鴿。為號。夜或遇賊。則蹲伏如狗。又或似棄屍。賊竟以此給去。書得達。如是者二十四次。援

兵至圍解。

見益縣元鹿洲初稿。

### 楊老痴

老痴。姓楊氏。名貞。字彥恒。宣城北鄉人也。晚自號老痴。人皆曰老痴。老痴云。老痴少孤。篤學。獨喜為詩。不干仕進。顏其堂曰慈壽。奉母濮陽。無晨夕離。出則衣短褐。與農人餉。婦課耕田間。意有所適。便朗吟清嘯。不務刻琢。略似陸放翁。士大夫多樂從之游。成化間。翰林簡討莊昶。聞老痴名。自江浦肩輿訪之。值一野老荷鋤。問老痴何在。荷鋤者微吟自若。莊笑曰。公即老痴耶。對曰然。遂握手。交極歡。老痴嘗暮春見。宴士游學。有飢色。吟以諷之曰。山前山後子規啼。聲聲叫道不如歸。士應聲曰。不是歸人歸不得。莫聽山禽說是非。老痴驚問姓名。曰左輔。字廷弼。江西進賢人。因揖留之曰。才如是乎。老夫伴讀。居歲餘去。成進士。以老痴嘗愛古琴劍。自京師致琴一劍一。而老痴已卒。左輔官行人。冊封海外。既返。為迂道。哭祭其墓。感動行路。先是御史賀某按部。作憶母詩。限呵字。不成。召問老痴。輒續之云。回思拜別寒窗下。凍手縫衣帶線呵。賀叫絕。厚為之禮。其為

詩任真捷給多類此所居曰斗山有斗山集藏於家又愛橫塘山水遂移家焉其地一名燕窩卒年六十有七子綱緝世其業族益繁今號燕窩楊氏

見施閩章愚山集

### 方召

方召字虎鄰宣城人為諸生貧寒失志明亡山谷兵起召輒集鄉里號義兵久之不利聞明之宗藩有稱國閩浙間者脫身走從之授兵部司務署衢州江山縣事縣交閩越道苦驛騷官又乘亂漁利自便有急則走民益病召至誓父老寬征斂自謂官兵曹法得戢兵禁往來騎使毋暴民毋橫索厨傳民呼真父母時清師定浙江金華府久抗不下屠其城師次江山人皆震恐召謂事已去毋徒殘民許父老迎師而肘繫其印冠帶北向拜曰孤臣無狀以死報陛下自投井死丙戌八月七日也在縣僅二十九日出其尸如生咸歎曰骨冷泉香矣今置亭井上曰冷香亭蓋縣齋之西偏也晝夜常形見官為位祀於署民像祀於廟左右二楔大書不愛錢不怕死蓋其視事時常牌書此六字出則使人負以前驅云墓在城南景星山碑曰明忠烈江山縣侯方公之墓康熙七年同里施閩章過江山至井所弔以詩曰濯骨寒泉迴絕塵為全黎庶不全身誰知一月

江山令竟作千秋俎豆人

見施閩章愚山集

劉日陽

劉生日陽。字若木。宣城北鄉人。父大生。為諸生。知名。早卒。生依母氏。體羸貌寢。鄉人不能識。生亦不往于人。獨族弟祖琨善之。嘗借書讀。午夜不輟。已習為詩。所居臨溪。窮蹙無事。獨吟。修渚大澤間。不知者以為狂。而其人實恪謹。貧甚。為童子授句讀。閒與郡中諸詞人往來。業日進。焚其舊稿。益肆力學古。日有常課。毋敢缺。順治辛丑冬。娶某氏。貌亦寢。夕將婚。俄中疾。若斷股。劇腎者。不能交禮。移宿召醫。醫皆愕然。就醫於郡。疾革。載歸。及門而卒。年二十有五。貧不能殮。祖琨為經紀其喪。其詩清新瀏爽。余嘗得數紙。誦之灑然。如疏鐘江岸寺。細雨板橋村。葉黃山下路。霜白渡頭船。荒村羣鳥亂。破屋一燈昏。市近魚蝦舂入饌。時危鼓角暮關心。古杉抱閣日光碧。芳藥垂階露氣涼。鷄聲一徑竹風內。煙火數家梅雨時。皆警句。為人所傳。然所積詩頗多。歲常成帙。或數易稿。死而零散。不見其全。為可惜也。日陽奉母謹。母死。日夜哭。已夢來告曰。兒夙世戒僧也。以心動墮此法。不當婚。若不婚。猶可數年活云。見施閩章愚山集

金俊明

金先生諱俊明。字孝章。吳縣人。少從其父宦甯夏。往來燕趙間。馳騁游獵。頗任俠自喜。

遼左多事。諸邊帥爭欲延之入幕府。先生意不屑也。既歸里。始折節讀書。受經于孝介朱先生之門。朱先生數歎異之。補縣學生。名隱隱起。數試於鄉。不見收。最後復赴試。以焦氏易筮之。得蠱之艮。其繇詞云云。先生愀然太息曰。天豈欲我高尚其志乎。吾將從此逝矣。遂不終試而歸。歸即謝諸生杜門。以傭書自給。是時明猶未亡也。踰年。流賊陷北京。又踰年。王師渡江。吳人始深詫先生知幾云。先生幼以善書著聲吳中。小楷師曹娥碑。行書師聖教序。悉有法度。晚益自名一家。兼工詩古文詞。四方士大夫聞先生名。以書若詩文來請者。相次不絕。里中窶人子。手不持一錢。亦日夕踵門乞先生書。先生欣然應之。不少厭也。以是三吳碑版旁及僧坊酒肆。率多先生筆。得之者爭相誇示。以為幸。間喜畫樹石。皆蕭疏有致。其墨梅最工。吳人尤傳寶之。先生年七十。徧乞常所往來者。賦生輓詩。引陶淵明自祭文為況。蓋其為風流雅趣如此。嘗有學使者慕先生名。願招致之。不可得。因歎曰。清真絕俗。雖古之沈冥不過也。壽七十有四。

見汪琬堯峯集

### 翁天章

翁君名天章。字漢津。吳縣人。以諸生入國子。上舍。為人喜聲色。縱游狹邪。順治十四年。來京師。與妓馮金者相好也。已盡散其所攜貲。不數月。馮竟棄君去。更歸他氏。而君猶



日夜歎說不自得。每對客必曰：吾負馮生。吾負馮生云。於是京師人皆以君為狂。翁氏世居洞庭之東山。君之族人。有逢春者。故明中書舍人也。其豪邁尤與君類。客金陵時。有所狎妓寇氏。以色藝擅名南苑中。先後費錢帛巨萬。始得娶為外婦。已復游臨安。輦橐中金二千於厲廡下。一日被酒歸。蹴金傷其趾。遽怒呼曰：吾明日用汝不盡。不得復稱俠矣。遂徧召故人游士。及妖童豔倡之屬。期詰旦集湖上。是日艤舫西泠橋。合數十百人。置酒高會。所贈遺纏頭無算。抵暮。問守奴餘金幾何。則已告盡矣。又有彥登者。亦君諸父行也。少任智數。武斷山中。當明愍帝時。置娼十二。各建一樓居之。高齋畫棟。制如掖庭。為怨家飛章所訐。下廵撫。捕置於獄。於是君與其族人。出家財居間。久之始得解。蓋翁氏以意氣相尚。類如此。今相距不過數年。逢春死。彥登老且病。而君亦溘落長安中。迄無所遇。翁氏幾無復前日之盛矣。然君意氣如故。終不以此自悔恨也。豈真古之范少伯原巨先之流耶。見汪琬亮峯集。

### 王武

王先生武。字勤中。明太傅文恪公六世孫也。以諸生入太學。少時風流儻爽。不屑意舉子業。自讀書賦詩外。若投壺。蹴鞠。彈碁。馬射。伎擊之術。與夫執花。種樹。養魚。籠禽之方。

無不通究。而尤長於畫。素善鑒賞。當王氏家門鼎盛。其先世所遺。及平時購獲者。率多宋元明諸大家名蹟。往往心摹手追。務得其遺法。故其所寫花鳥動植。信意渲染。皆有生趣。家本饒裕。而王先生雅不事生產。數為徭賦所困。又性好施予。親故間或有負之者。亦概置不問。計一歲所入。輒緣手盡。以是其家遂落。南壯乃屏絕諸好。獨以高潔醞藉自持。所居為文恪公故第。其旁怡老園。有亭榭花木水石之勝。恒與賓從及諸昆弟。具蔬果酒食。醵詠其間。值其空無時。亦必清坐相對談笑。移日不倦。家既益落。而所作畫益工。諸好事者。評王先生畫。雖前輩陳山人道復。陸處士叔平。不能過也。前太常王翁煙客。亦善畫。尤亟稱之曰。近代寫生家。多畫苑氣。獨吾勤中所作。神韻生動。當在妙品中。於是其聲譽大噪。四方士大夫。走書幣造請者。日夕相屬。寸縑尺素。流傳遠近。莫不鄭重藏弄。甚有作贗筆以售者。京師貴人。爭慕王先生名。出兼金訪求其畫。不能得。內閣宋文恪公。即王先生姊婿也。方貴顯於朝。移書招先生入京師。先生笑而不應。嘗語人曰。古之善畫者。莫一非高人傑士。以文行著者也。有如文恪公諸客。沈徵君。唐解元。文待詔之屬。其人皆能為畫。重不則畫豈能重人乎。蓋晚而自號忘庵。或徵其說。王先生告之曰。魚相忘於江湖。人相忘於道術。令余

之補則息機於此也。世忘余乎。余忘世乎。兩相忘則去道也近矣。其屬意超卓如此。年僅五十有九卒於家。居平善病。晚歲病屢發。不復多作畫。故人有貧乏者。輒強之使作。王先生欣然執筆曰。願以佐吾子晨夕需。族父年老有孫女。不能嫁。王先生復力疾為作數幅。俾鬻以治奩具。客有以病諫者。王先生曰。吾財不足而力有餘。敢自愛耶。先是積藏諸名蹟。及他玩好甚夥。中歲斥以易薪米。幾罄矣。疾既革。又命諸子盡出篋行中所餘。贈遺諸親故。無復存者。見汪琬堯峯集。

### 沈通明

淮安沈通明。字克赤。嘗為前明總兵官。任俠輕財。好從中原士大夫游。士大夫皆稱之。數與賊戰有功。順治二年。先是有巡撫田仰者。素習通明之為人。加禮遇焉。至是見明將亡。遂屬其家通明。而身自浮海去。通明匿仰妻子他所。會王師渡淮。購仰妻子急。蹤跡至通明家。且並捕通明。是時通明已散遣所部。杜門久矣。捕者凡十餘輩。合謀圍其居。通明走入寢門。飲酒數斗。裂帛束縛其愛妾。負之背。而牽騎。手弓矢以出。大呼曰。若輩亦知沈將軍耶。遂注矢擬捕者。皆遠。巡引卻。通明疾馳。與愛妾俱得脫。僦居蘇州。變姓名。賣卜以自活。未幾愛妾死。意不自聊。入靈巖山。祝髮為浮屠。已

復棄浮屠服。北訪故人於鄧州。通明故魁壘丈夫也。美須髯。以飲酒自豪。又善度曲。每醉輒歌呼鄧州市上。間以曼聲雜之。酸楚動聽。一市皆以為狂。而彭公子錢其州人也。素有聲望於江淮間。罷巡撫家居。獨聞而異之。偵得通明所在。徒步往與之語。通明默不應。已詢知為彭巡撫。乃大喜。吐實。公捉其手曰。君狀貌稍異。必將有物色之者。非我其孰為魯朱家乎。引與俱歸。公亦豪於酒。日夜與通明縱飲甚歡。居久之。遇赦始得出。通明少以勇力聞。嘗與賊戰。賊射之洞腹。通明急拔矢。裂甲裳裹其創。往逐射者。竟殺其人而還。由是一軍皆壯之。令且年八十矣。膂力雖稍衰。而飲酒不減少時。任俠自喜。亦如故也。始居蘇州。變姓名曰申宗耿。及為浮屠。又名元弁。劉吏部公勇曾有序贈之。至比之前宋姚平仲。龍伯康云。見汪琬虎峯集

### 張霖

張處士霖者。字杏禧。世為新城東南杜柯村人。處士居張店鎮之東偏。有田數十畝。闢園一區。種松百頭。其南築小臺。東望花鐵馬。公諸山。其北有亭有池。綠葵紅蓼。早韭晚菘。取給有餘。處士生萬歷中。時海內無事。不樂仕宦。獨喜賦詩飲酒。以善釀聞鄉里。歲所收秔稻。租賦外。盡以供釀。中更世變。并屏跡逃俗。袞衣博帶。婆娑田野。以

終其身。始余過野寺。見處士題壁詩。異之。康熙甲寅。過訪其園居。處士欣然倒屣出。坐于池上。指松謂余曰。是皆老夫手種。今五十年矣。時處士年已八十。意氣蓬勃。引滿勸客。如少壯人。自言生平不入城市。不謁官府。歲正月。則畢納一年之賦稅於官。故胥吏追呼。未嘗及門。今老矣。旦暮且死。死則遺令子孫。以布衣斂。即日入壙中。不棺槨。不封樹。少讀漢史。慕楊王孫之為人。願以末路。師法其萬一。其言曠達如此。見王

士頴漁洋  
山人集

### 劉任

劉任字宏父。一字繹弦。潁川人。生而一瞳子。正方。登隆慶丁卯賢書。嘗著唐巾。衣淺紅窄衫。乘駿馬。挾彈林薄間。或目笑之。先生弗屑意也。一日。謂家人曰。仙伯期我海上。某日暫還。當設醴相待。題一詩。有明白來時明白去。君看直北起雙鳧之句。遂瞑。至日。空中聞羣鶴聲。香氣冉冉下。人稍稍異之。後十年。先生故人客燕中者。來云。見先生書一詩於西山蘭若。僧曰。日者一先輩留題。亦時時往來寺中。問其狀實。先生也。遲寺中數日待之。不復至矣。每問及見先生者。曰。承平時士大夫高自標持。先生居東郭。門楹內置碁一局。有過者。輒留與戲。販負傭保。皆得掀髯攘臂其間。其於世

無吟哇皆此類。

見劉體仁文集。

### 曹永鼎

曹永鼎自號真陵子。汝陰人。予於己庚間。年少氣盛。妄意當世之略。真陵謂予曰。世將易矣。宜勿事事。眎一圖。記乾象之變。問其期。曰。殆不出十年。因慷慨歎息。真陵家故饒。招致四方士。談天文。道甲風角。鳥占諸術。善騎射。技擊。又妙解音律。好彈琴。下及絲竹匏革。凡器之可以成聲者。無不觸手調諧。其與世若嬰兒。每羣聚。使雜占射。覆為笑樂。率易其語。又嘗夜與女中庭。真陵曰。火在斗。當有主兵大臣當之。以日占之。在內不在外。未閱月。大司馬陳新甲。以泄禁中語。坐他罪死。甲乙間。依余居。己丑春。余出遊。真陵忽盡焚所藏識緯諸書。獨留一冊。付侍者曰。以此貽劉子。越日卒。蓋文數篇。皆論琴理。見劉體仁文集。

### 詹夢符

詹篆文。名夢符。父曰景明。甲寅山寇之變。景明病足。匿居旁草樓。篆文則脫身林莽間。見鄰村賊有舉火者。篆文心動。復還曰。賊至此。樓必為灰燼。蓋亟去。景明曰。若偕行。則父子俱死。無益。汝慎為宗祧計。篆文號泣。不忍舍。竟負父以逸。未里許。為賊所

及篆文被數創死。而景明以老病得免。聞者皆為泣下。初篆文誕時。景明夢箕星入室。欲名應箕。以志其瑞。時貴池有吳應箕者。亦感異夢而生。負重名海內。景明不欲相襲。遂改名夢符。後吳應箕以諸生死國難。而篆文卒冒白刃。以身殉父。豈忠孝之氣。上為列星。先後固以類感耶。見毛際可安序堂集。

劉宗洙劉恩廣

孝子劉氏宗洙。字長源。恩廣。字錫三。河南襄城人。四冲之二子也。明季闖賊構亂。圍督師汪喬年於襄城。四冲以從事佐城守。城陷。督師罵賊死。並執四冲。身被數創。幾斃。恩廣兩耳皆斷。號泣負父以歸。時宗洙已遁去。聞父難。往赴賊。怒。截其耳鼻。後數載。四冲邁疾。宗洙取糞竊嘗之。事甚秘。鄰人郭景儀妻。從壁隙窺見之。以告景儀。令海內傳襄城有嘗糞孝子者是也。父歿。破產營葬。同季弟宗泗。合爨養母。數十年。家庭雍睦。其居有六燕共巢。又芝生於寢門者。三人以為孝友所感。已而宗洙以明經授州司馬。恩廣屢試不第。遊太學。當得官。皆以母老不仕。及母卒。結廬墓側。毀瘁骨立。居歲餘。恩廣竟得歐血疾。學博馬奪錦。至榻前。反復慰解。恩廣曰。勿復言。吾五內裂矣。尋卒。宗洙亦以積衰兼痛弟故。相繼歐血。遂不起。里中私謚其兄弟曰孝友。曰



純孝云。見毛際可安序堂文鈔。

霍亮雅

霍則白字亮雅。曲周人。原名奇。字則白。以字行。近世少以字行者。亮雅與友人刺。署字。蓋以為名也。而友人不知。以為慢已。亦以字答之。後聞之。呀然一笑也。父如白公。以進士為參政。好飲。早休致。亮雅好飲。如其父。父喜。更縱之飲。性脫落。恥問家人細事。與人無競。終其身。無疾言怒色。迨其老。貧矣。卒不肯蹙額向人。貌清癯。如鶴。語操南音。乍見之。不知其為河朔間人也。生平好尚屢遷。好理學。嘗刻行先儒語錄。好佛茹素。持準提戒。勒須菩提象。虔事之。好仙。奉呂純陽。憑箕語。倡和談。謔如生人。好詩文。古人書。無所不翻閱。間為詩。清迥脫俗。尺牘隨手。類蘇黃小品。讀之解頤。好書畫古玩。能鑒別真贋不爽。得名人手蹟。雖片紙寶惜之。必裝潢為卷帙。瓦尊銅鼎。皆法物。位置精雅。好客。所居第宏敞。甲於邑。多叢臺複閣。吳越之士。至者如歸。供其館穀。輿馬之費。無夕不高會。家以是中落。不恤也。好歌。常自蓄優伶。其自遠方至者。必窮其技。好博。作博疏。摹畫博事。曲盡。酒闌燈地。呼聲動天地。常負負益豪。不以勝敗為意。好遊。遊不出數百里外。乘小犢車。車中自攜酒。所至有招之者。輒出已酒飲之。或

贈以金幣。聽人自取去。好潔。日輒數浴。几案無纖埃。令兩童子執箕帚隨之。涕唾必掃除。客謂其庭一草一木。皆有六朝風致。晚多病。諸好悉罷。獨好客益甚。不能飲。而卧觀客飲。客歡乃大喜。久之。病益劇。自知死期。與親故別。談笑而逝。年五十歲。見申集

### 沈頤

沈頤字朗仲。美髯秀頤。自幼不肯治舉子業。喜神農氏之學。黃帝扁鵲之書。受學於徐恂庵。李士材。切脈處方。為人治病。決生死多驗。崇禎十一年。授太醫院吏目。不赴。居數年。而天下方亂。兵駐蘇州。無貴賤主客文武。悉就君及錢唐人劉默生所治病。兩人齊名。後默生將治病太倉。鬼嘯于病者之榻曰。劉生來。吾事不濟矣。其一曰。不如先殺劉生。明日。默生入室。將診。暴病卒。於是獨有君。若有病。機合論若干卷。付其門婿陸其清。藏於家。庚戌十一月。受戒於靈巖儲和尚。修出世法。明年正月卒。年六十有九。君寫字賦詩。畫山水小景。皆有法。以治病掩其他長。見頤云

### 孝賊

賊不詳其姓名。相傳為如皋人。貧不能養母。遂作賊。久之。為捕者所獲。數受笞於有

司賊號曰。小人有母。無食。以至此也。人且恨且憐之。一日母死。先三日。廉知鄰寺一棺寄廡下。是日。召黨具酒食。邀老僧。寺中痛飲。伺其醉。昇棺中野。負其母屍葬焉。比反。僧尚酣卧也。賊大叫叩頭乞免。僧驚。不知所謂。起視廡下物。亡矣。無何。強釋之。厥後不復作賊。見王猷定四照堂集。

### 汪魏美

汪魏美。諱澗。新安人。徙於錢唐。孤貧力學。舉崇禎己卯鄉薦。乙酉兵亂。奉母入天台。海上師起。羣盜滿山。始返錢唐。僑寓北郭。室如懸磬。處之淡如。當是時。湖上有三高士之名。皆孝廉之不赴公車者。魏美其一也。當事亦甚重之。監司盧公尤下士。一日。值魏美於僧舍。問汪孝廉何在。曰適在此。今已去矣。盧公然之。不知應者之即魏美也。盧公遣人通殷勤於三高士者。置酒湖船。以世外之禮相見。其二人幅巾抗禮。盧公相得甚懽。惟魏美不至為恨事。已知其在孤山。放船就之。魏美終排牆遁去。魏美不入城市。不設伴侶。始在孤山。尋遷大慈庵。又遷寶石院。匡牀布被之外。殘書數卷。鎖門而出。或返或不返。莫可蹤跡。相遇好友。飲酒一斗不醉。氣象瀟灑。塵事了不關懷。然夜觀乾象。晝習壬遁。知其耿耿者。猶未下也。乙巳七月三十日。終於寶石僧舍。

年四十八臨歿悉舉書卷焚之。詩文無存者。嘗思宋之遺民謝翱。吳思齋。方鳳。龔開。鄭思肖。為最著。方吳皆有室家。翔亦晚娶劉氏。開至貧。畫馬。有子同居。惟思肖孑然一身。乞食僧厨。魏美妻死不更娶。有子。託於弟。行事往往與思肖相類。遺民之中。又為其所甚難者。見黃宗羲南雷文定

### 王征南

少林以拳勇名天下。然至於搏人人亦得以乘之。有所謂內家者。以靜制動。犯者應手即仆。故別少林為外家。蓋起于宋之張三峰。三峰為武當丹士。徽宗召之道梗不得進。夜夢元帝授之拳法。殿明以單丁殺賊百餘。三峰之術。百年以後流傳於陝西。王宗為最著。温州陳州同從王宗受之。以此教其鄉人。由是流傳於温州。嘉靖間張松溪為最著。松溪之徒三四人。而四明葉繼美。近泉為之魁。由是流傳於四明。四明得近泉之傳者。為吳昆山。周雲泉。單思南。陳貞石。孫繼槎。皆各有授受。昆山傳李天目。徐岱岳。天目傳余波仲。吳七郎。陳茂宏。雲泉傳盧紹岐。貞石傳董扶輿。夏枝溪。繼槎傳柴元明。姚石門。僧耳。僧尾。而思南之傳。則為王征南。思南從征關白。歸老於家。以其術教授。然精微所在。則亦深自秘惜。掩關而理。學子皆不得見。征南從樓上穴

板窺之。得梗概。思南子不肖。思南自傷身後。莫之經紀。征南聞之。以銀卮數事。奉為美饋之資。思南感其意。始盡以不傳者傳之。征南為人機警。得傳之後。絕不露圭角。非遇甚困。則不發。嘗夜出偵事。為守兵所獲。反接廊柱。數十人轟飲守之。征南拾碎磁。偷割其縛。探懷中銀。望空而擲。數十人方爭攫。征南遂逸出。數十人追之。皆踏地匍匐不能起。行數里。迷道田間。守望者又以為賊也。聚眾圍之。征南所向。眾無不受傷者。嘗歲暮獨行。遇營兵拔刀擬之。征南手格者。而營兵自擲仆地。鏗然刃墜。如是者數人。最後取其刀投之井中。營兵索縵出刀。而征南之去遠矣。凡搏人皆以其穴。死穴。暈穴。啞穴。一切如銅人圖法。有惡少侮之者。為征南所擊。其人數日不醒。踵門謝過。始得如故。牧童竊學其法。以擊伴侶。立死。征南視之曰。此暈穴也。不久當蘇。已而果然。征南任倭。嘗為人報讐。然激於不平。而後為之。有與征南久故者。致金以讐其弟。征南毅然絕之曰。此以禽獸待我也。征南名來成。姓王氏。征南其字也。自奉化來鄞。祖宗周。父宰。元母陳氏。世居城東之車橋。至征南而徙。舉少時。隸盧海道。若騰海道較藝給糧。征南嘗兼數人。直指行部。征南七矢破的。補臨山把總。錢忠介公建閩。以中軍統營事。屢立戰功。授都督僉事。副總兵官。事敗。猶與華兵部。句致島人藥。

書往復。兵部受禍。讐言未懸。征南終身菜食。以明此志。識者哀之。征南罷事家居。慕其才藝。以為貧必易致。營將皆通殷勤。而征南漠然不動。鋤地擔糞。若不知己之所長。有易於求食者也。一日過其故人。故人與營將同居。方延松江教師講習武藝。教師倨坐。彈三弦。視征南麻巾縵袍。若無有。故人為言。征南善拳法。教師斜睨之曰。若亦能此乎。征南謝不敏。教師軒衣張眉曰。亦可小試之乎。征南固謝不敏。教師以其畏己也。強之愈力。征南不得已而應。教師被跌。請復之。再跌而流血被面。教師乃下拜。費以二縑。征南未嘗讀書。然與士大夫談論。則蘊藉可喜。了不見其為麤人也。予嘗與之入天童。僧山談。有脅力四五人不能掣其手。稍近征南。則蹶然負痛。征南曰。今人以內家無可炫耀。於是以外家撓入之。此學行當衰矣。忽忽九載。征南以哭子

死見黃宗義  
初雷文集